

**NATIONAL ASSEMBLY OF  
SEYCHELLES**

*Thursday 18<sup>th</sup> November,  
2021*

*The Assembly met at 9am*

*National Anthem*

*Moment of Reflection*

*Mr Speaker is the Chair*

**MR SPEAKER**

Bonzour tou Manm Onorab. Bonzour piblik ki pe swiv nou. Bonzour nou *staff*. Nou'n rasanble pou kontinyen travay deba lo *Appropriation Bill*. Madanm raporter ou ava apel Minis silvouple.

Bonzour Minis Naddy Hassan e byenveni pour nou travay dan Lasanble. Laparol i pou Onorab Desheila Bastienne.

**HON DESHIELA BASTIENNE**

Mersi Mr Speaker. Bonzour Mr Speaker. Bonzour Minis. Bonzour tou koleg Onorab e bonzour tou bann dimoun a lekout, enkli ki tou bann zabitan Perseverance.

Mr Speaker sa Bidze ki Minis in met devan Lasanble pou lannen 2022 i en Bidze ki serten dimoun pa pou dakor avek, senpleman pou zis de rezon prensipal.

Dan sa Bidze, pa'n promet gro logmantasyon, pa'n promet trezyenm mwan saler. Me i a pe demann Lepep Seselwa pou ankor enn fwa annan en pe pasyans e annou fer ankor en pe sakrifis.

Mr Speaker si dan sa Bidze ozordi ki devan nou Minis ti'n vin dir ki tou travayer dan Sesel pou ganny en gro logmantasyon e tou dimoun pou ganny peye trezyenm mwan saler, sa ti pou pli bon Bidze. E Gouvernman ti pou kapab fer tou lezot keksoz lekontrer e mal, ti pou napa problem.

Mr Speaker Gouvernman in vin fran. In met lo latab sityasyon pei e ki i oblize fer, pou fer sir ki sa pei i reste lo son lipye. E ki tou Seselwa i kontinyen ganny en saler tou le mwan.

Byensir en pep i pou toultan ekspekte bon nouvel. Ki i pe al ganny bokou larzan, i pe al ganny promosyon. E sa pou fer li ganny plis larzan dan son pos.

Ozordi, Lopozisyon pe lager lebra kase pou zis de keksoz. Plis larzan dan pos Seselwa e oli trezyenm mwan saler? Me sa ki zot pa pe fer Lepep Seselwa konpran la deor, sa ki sa ki pli enportan se ki labaz, pou fer en pei marse, se ki Gouvernman in fer li son devwar, pour ki tou bann Minister ek bann

Departman e tou bann Lotorite ki i kontinyen fonksyonnen. E fer ki Seselwa i annan travay.

Mr Speaker dan sa Bidze, Gouvernman in fer sir ki lasante i kontinyen marse. Seselwa i kontinyen resevwar lasante gratwit. E sa ki i merite i ganny son lasante spesyalize aletranze.

Ledikasyon i kontinyen devlope, tou lekol i reste ouver. E zanfan i ganny son ledikasyon gratwit. Karbiran i kontinyen antre dan pei pou fer bann lizin fonksyonnen. E transpor bouze lo semen.

Por i reste fonksyonnen pou komodite debaz. Ek manze kontinyen antre, pou nou pep pa mor lafen. Erport i kontinyen reste ouver e fonksyonnen, pou touris kontinyen antre pou anmenn deviz etranze, pour ede elev lekonomi pei.

*PUC* i kontinyen fonksyonnen pou Seselwa bwar delo prop, e ganny kouran. *LWMA* i kontinyen gard pei dan lapropte. E Lapolis ek larme i kontinyen fonksyonnen pour sekirite nou pei.

Sekirite sosyal, pansyon, *carer*, *welfare* i kontinyen donnen tou le mwan enkli tou travayer i kontinyen ganny en saler.

Mr Speaker, eski Lepep Seselwa pou les Lopoziyon

bat zot latet avek en trezyenm mwan saler? Fer politik lo la? Fors zot anlwaye donn zot trezyenm mwan an Desanm, e an Mars sa biznes i kolaps e zot vwar zot san en lanplwa?

Mr Speaker dan pei ozordi, nou pe les nou ganny antrennen avek sa kalite latitud. Donn mwan sa ki annan ozordi, pli tar nou a gete ki nou pou fer! I malere ki dimoun la deor pe zis ekoute, ki kantite larzan ki antre dan kof Leta.

Si lakantite touris, ki vin, in vin Sesel pe kontinyen ogmante? Ki kantite avyon ki pe apoze lo Erport Sesel? Si deviz in desann e pe antre bokou dan labank, e ki kantite *tax* ki Gouvernman pe kontinyen anmase? Eski ozordi, se tou ki nou enterese tande?

Konbyen nou ki pe demande, ouswa ki vreman enterese konnen si sa kantite reveni, ki Gouvernman pe anmase, i ase pou kouver depans pei? Sa gro det pei, ek sa kof vid, ki nou Gouvernman in erite, e ki'n tonm lo son zepol, eski nou pe demande, ki kantite ki in kapab komans repeye, e ki kantite ki nou ankor drwa?

Eski la dan sa lespas 1an, 1an Mr Speaker, ki letan bann Onorab dan Lopoziyon i koz lo la, zot trenn sa mo '1an' konmsi zot pe trenn 5an, ki

Gouvernman *LDS* i o pouvwar. Zot senserman krwar ki Gouvernman in fini ganny ase pou komans partaze e fer tou dimoun kontan?

Mr Speaker, sa latitud annou servi tou sa ki annou servi tou sa ki mon annan ozordi, e demen mon a gete ki i reste, in gat fason panse bokou nou dan sa sosyete.

I zis parey ou pe touse, dokter i donn ou siro latou pou servi pou 8 zour. Apre 3 zour ou aret touse, ou decide zet sa siro akoz dapre ou, ou'n fini byen. Me zour latou i relev o pli bel, se la prezan ki ou realize ki ou ti'n devret esper ou 8zour pou ou vwar son vre rezilta. E pou ou ganny ou lasante.

Me tro tar, boutey siro in fini perdi. Ozordi se sa fason ki Lopoziyon, pe servi pep Seselwa la deor, e pe andoy zot lespri avek bann fo deklarasyon. Enn pti gin larzan antre dan kof, annou komans donn bal. Akoz se koumsa menm, ki zot ti fer letan zot ti la. Sankwa ozordi pei pa ti ava dan sa lamizer.

Mr Speaker sa Bidze ki Minis Finans in prezant Seselwa, i ase prometan. E si nou swiv li byen an detay. Nou pou vwar i Gouvernman, in vin avek en plan, ki pou kapab elev nou lekonomi e retir pei lo son zenou.

Mr Speaker Minis in deza dir ki ler i ti rantre dan

Gouvernman e paran sa pozisyon, leta lekonomi pei ti fer per, akoz sityasyon finans sa pei ti vreman dan mal. E i ti menm demann son lekor si pou annan saler pou peye ankor dan detrwa mwan ki pe vini.

Me avek nouvo fason zer nou bann reveni, Gouvernman ti deswit komans fer restriktirasyon nesaser. Elimin bann diplikasyon ek bann gro, gro *allowance*. Met en lord dan sistenm, donn *welfare*, ouver Erport.

E sa ti fer ki Gouvernman, ti reisi kontinyen pey tou saler, pey Sekirite Sosyal e pey pansyon.

Mr Speaker, parey mon bann koleg Onorab in dir, an 2020 letan *US* ti ankor o pouvwar, ansyen Minis, ansyen Minis Finans dan Gouvernman *US* ti dir, ki Gouvernman *US* pou bezwen fer en gran refleksyon lo saler.

Zot ti'n fini, konnen ki problenm pei pe tonm ladan. Zot ti konnen napa larzan. I ti menm dir ki Gouvernman pou bezwen revwar sa trezyenm mwan saler.

Savedir i ti pe anvoy en mesaz depi 2020 avan ki zot ti sorti lo pouvwar. Ki byento mannyer pei pe pran lapant, si zot ti ankor la, ti pou napa swa. Me reviz tou saler Gouvernman, e i ti kler ki zot ti pe pas zot mesaz ki ti pou

napa trezyenm mwan saler 2020, ni 2021.

E ozordi, i kler ki zot bezwen fer zot politik. Zisteman pou zot kouver zot salte ki zot in kit sa pei ladan.

Mr Speaker letan Lasanble ti ganny dizourd an Out 2020, eski, Lepep Seselwa la deor ti pe realize lekel ki ti pe kontrol finans pei. Ki bal ki zot ti pe profite pou donner dan sa pti morso ki ti reste vi ki zot ti'n fini santi zot defet ki ti pe vini?

*FA4GR* tou sa ki ti pe siport Gouvernman *US*. Ki ti montre zot sipor atraver diferan aktivite, zot ti pe byen pase tou le mwan. \$50milyon, ozordi ti a dan kof, pou nou donn nou dimoun en trezyenm mwan! Sa ki ti anmas larzan, dan tou kote. Me pa ti kontribye nanryen dan peyman *tax*.

Si zot pa ti'n abiz zot pouvwar, e servi larzan mannyer zot ti anvi, ozordi nou ti a zwenn en kof ki ti ava annan ase pou fer kontan tou fanmir Seselwa. Ki ti kontribye pandan sa dernyen 4an ki *US* ti o pouvwar. Zot ki ti fer zot kontribisyon, zot pa rode oli ki Gouvernman *US* in fer avek?

Mr Speaker mal zer larises sa pei, ozordi son reperkisyon i tonm lo zepol Gouvernman *LDS*. Me sa pou fer son Gouvernman ek son lekip per. Akoz se pou se la ki

Gouvernman in met en Bidze lo latap, ki pou vin dan lentere tou zanfan Sesel.

Mr Speaker, mon santi ki nou bezwen mazin de kote. Proverb i dir apre lakontantman *il y a de pleurs*. Ozordi nou a degorz Gouvernman pou trezyenm mwan. Pou donn logmantasyon, apre nou menm ki pou demande akoz i pa ti'n espere. E kote ki'n al mal?

Mr Speaker nou bezwen siport nou Gouvernman dan nenport ki fason ki nou kapab fer li. E nou bezwen nou osi, sak endividi zwe nou rol dan lekonomi nou pei e la mon a site;

Nou bezwen elimin koripsyon, ler nou vwar labi pe ariv anba nou nennen. E nou konnen ki demen sa pou fer nou maler, e pou afekte nou lekonomi. Fodre nou *voice out*, e nou fer en fason pou sa arete.

Ler nou pas nou letan pran tou sa ki nou kapab dan nou landrwa travay, akoz pa nou ki'n aste an dizan "sa larzan pa sorti dan mon pos!"

Nou kontinyen kas transpor Gouvernman kot i kontinyen antre sorti dan garaz. Abiz lo *fuel*, trenn nou lipye, vandaliz e kas lakaz Gouvernman. E apre se Gouvernman menm ki bezwen vin re-aranze. Depans pou

kontinyen ogmante e larzan pou kontinyen ale.

Mr Speaker, letan serten pa oule pey kontribisyon *tax*. Ler nou al dan en laboutik e nou vwar sa marsan pe servi *calculator* dan plas *cash register*, pou li pa pey *tax* ki i merite. E nou pa dir li nanryen, larzan pa pou antre dan kof Leta.

E nou pou kontinyen plenny logmantasyon ek napa *incentives*.

Ler nou pa fer nou travay, zis e prop kot Ladwann e nou les enportater pase avek de milyon i pou kontinyen vin pli difisil pou ou ganny en trezyenm mwan saler, akoz ou ki'n swazir pou les, sa biznessmenn kontinyen anrisir son lekor.

Mr Speaker, letan nou mem nou Seselwa nou pa oule pran nou travay o serye. Nou kontinyen rod toudsort leskiz, nou pa oule fer en zefor an plis, pou travay en pe pli dir e ek plis erdtan.

Nou pa oule aprann pou nou kapab pran plas sa etranze. E nou kontinyen donn etranze loportinite pou travay, dan nou plas. Nou pou toultan, vwar larzan an plis dan nou kof pe sorti - akoz? nou pou bezwen pey lakaz, loto, *allowance* pou sa etranze. E nou deviz pou kontinyen al dan zot pei!

Letan serten travayer i deside fer sabotaz. Sirtou dan serten Minister, eski li menm li sa travayer ki pe esper en trezyenm mwan saler lafen lannen?

Mr Speaker, Minis Finans in dir ki bann desizyon dan sa Bidze pa'n enn facil. Me aksyon in bezwen ganny pran pou nou arive stabiliz nou pei e anpes li koule. E fer sir ki personn pa perdi son plas travay. Pou nou sirmont sa sityasyon difisil, nou bezwen ankor enn fwa pran desizyon dir. Fer sakrifis e kontribye dan lekonomi nou pei.

Mr Speaker parkont nou vwar bokou keksoz ki pe refleri dan nou pei. Tel ki plis touris pe rantre, larive bann bato krwazyer ki pe al komanse dan de semenn. E la mon fyer poudir ki Por Victoria in fini boukte ziske Mars lannen prosenn.

Pou nou *welcome* larive bann bato krwazyer. Tousala in materyalize gras a sa bon desizyon pran par Gouvernman avek Minister Lasante, pou ankouraz nou pep desann e al pran zot vaksen kont *COVID*.

Mr Speaker plis prodiksyon dan sekter dan prodwi lokal pou ede, pou ed pei redwir lo lenportasyon e tir presyon lo deviz etranzer. Lagrandisman dan Sekter

Lapes ek Lagrikiltir, plis devlopman lo nou bann zil.

Relev prodiksyon kanmaron. Logmantasyon dan koleksyon *tax*. Tousala pou ede anmenn larzan dan kof nou pei, e nou pep ki pou rezouir demen.

Mr Speaker bann bon nouvel ankor se restriktirasyon e sanzman ki pe al arive dan bann *Scheme*, ki pe kree bokou depans lo Gouvernman, pe al reget bann sistenm netwayaz, e *tender*, kot sa ki pa ti pe travay preski ditou, ti pe ganny gro sonm larzan, bann konfli lentere kot *staff* dan en Minister, ouswa dan en Departman, zot menm zot, zot ti pe partisip dan *tender* lanmenm la anndan.

E se zot menm ki ti pe ganny *tender*. Bann diplikasyon dan Gouvernman ki pa nesaser. Elimin bann *post* ki ti ganny kree zis pou fer faver dalon. Konsantre plis lo konstriksyon bann *low cost housing* pou anmenn soulazman pou nou bann fanmir. Ki ankor pe esper en lakaz.

Nouvo fason travay, ki ava aport plis reveni pou pei, fer desann pri lavi. E la mon fyer poudir *STC* in fini komans fer son bout dan fer desann pri lo bokou komodite debaz.

Mr Speaker, mon pou enplor nou bann frer ek ser

Seselwa, pou aret ekout rimer. Aret krwar dan tou sa bann propagann politik sal la deor. E lo *facebook*, ki met konfizyon dan zot latet, e pe met pei an aryer.

Sa bann dimoun ki ozordi pe lager lebra kase pe dir donn trezyenm mwan saler, zot pe zis fer teat, pou kasyet zot lakanmizri ek lafason ki zot in detri lekonomi sa pei. Zot in la pou 43an, si zot ti'n byen anmenn sa pei ozordi zot ki ti pou ankor o pouvwar.

Ozordi ti ava annan larzan pou zot don tou dimoun gro logmantasyon. Ozordi tou travayer ti ava ganny en trezyenm mwan saler. Se gras a zot ki ozordi Gouvernman *LDS*, pa kapab fer fanmir Seselwa kontan. Ase les sa bann dimoun bat zot latet e servi zot pou kasyet deryer.

Mon bann frer ek ser - mon bann ser ek frer, pa al fer bann keksoz ki demen ou pou vwar ou dan en pyez. Mr Speaker, mon ti a kontan pas sa mesaz ankor enn fwa. Ler ki mwan ti fer politik dan travay, lepok *SPPF/Lepep* mon ti en *teacher*. Mon ti ganny pouse dan travay, san okenn lapey, ni konpansasyon.

Mon ti ganny met deor ankor dan travay kot *SMB Fish Division*. Akoz mon ti kontinyen fer politik dan travay. E safwasi, mon ti

ganny mon mesaz sorti direkteman kot Prezidan Rene, ki ti dir avek mwan, "ou pa pou zanmen travay dan Gouvernman." E mon ti mont lo en *blacklist*.

Eski ozordi sa lord in ranverse? Akoz zot ki dan Lopozisyon, la i *ok* pou zot anvoy travayer fer politik dan son landrwa travay? Pep Seselwa pran en letan e fer en bon analiz lo sityasyon pei. Ki manner nou'n vin zwenn li, kwa ki Gouvernman in fer, e kote nou'n arive ozordi, e ki plan nou Gouvernman i annan pou lefitir.

Mr Speaker nou pei i bezwen stabilite. I bezwen nou sipor, nou konfidans, nou kontribisyon e nou lwayote. Lopozisyon i la pou senm konfizyon e kree destabilite dan pei, dan zot fanmir, antre zot zanmi e dan bann landrwa travay.

Fodre nou debout for, nou travay ansanm e nou pare pou aksepte bann regleman ek sakrifis. Ki nou Gouvernman pe demann nou, kot a lafen nou a rekolte fri nou zefor e nou a mars ansanm lo en bon semen.

Mr Speaker, mon pou osi profite, lo non zabitan ek Lotorite Distrik Perseverance, pou remersye Gouvernman, *SFA* ek tou lezot *partners*, pou sa bon travay ki zot pe fer. Pou ki zabitan Ile Perseverance a

lafen i a ganny en bazar konvenab, pou pwason fri ek legim.

Mon dir zot mersi akoz menm ki sa proze pa ti dan Bidze pou sa lannen, me zot in ekout lavwa e onor demann bann zabitan ek peser Perseverance. Mersi osi bann zenn Perseverance, ki annan bokou pou ofer e ki pare pou vin devan avek bann zoli plan, ki ava dan lentere tou zenn Perseverance.

Parey zot pe demann *indoor multipurpose court*, mon pou demann Minister Gouvernman Lokal ek Minister pou Lazenés pou ekout zot lavwa, e fer sa materyalize. Dan Perseverance i annan bokou talan. I tre enportan ki nou larg lanmen nou bann zenn. E siport zot dan zot bann plan.

Nou bann artis ek bann mizisyen ki ankor pe vir an ron pou ganny en landrwa, pou zot demontre zot talan, e osi pare pou anmenn bann zenn *onboard*.

Mon demann zot pou annan en pe pasyans. Pa les bann move lenfliyans trenn zot ater, reste for e pozitiv. Ankor mon pou dir Sesel i pou reste pou tou son zanfan, akoz mwan mon pou donn zot tou mon sipor.

Mr Speaker permet mwan poudir detrwa mo lo lapar mon koleg Onorab

Esparon, ki lo en misyon travay Lasanble an deor pei. Onorab Esparon i dir “ki ler mon analiz sa Bidze, e prenon kont sa kantite difikilte ki lenpak *COVID*, in met nou pei ladan, mon vwar ki bann mezir ki Gouvernman i anvizaze pran pou redres sa pei i dan bon direksyon. Malgre ki i sanble en pe dir pour serten.

E sa Bidze i osi fer nou realize, ki si Gouvernman ti'n trenn lipye e kit nou pei dan *lockdown*, ozordi bokou keksoz ki nou pe akonplir, pa ti pou ganny realize. E si Prezidan Ramkalawan, ek son lekip pa ti pran sa linisyativ pou koup en pe sa bann labi ki ti pe ganny fer anba ladministrasyon presedan, e rod *IMF*, keksoz ti pou bokou pli grav.

Mersi Minis ek ou lekip, pou sa bann desizyon brav, ki zot in pran.” Onorab Esparon i dir.

“Mr Speaker an menm tan, mon apresye ki lo kote mon distrik Glacis, kantmenm lo kote Minister Lapes zot in met en pe lanfaz, pou amelyor sityasyon nou bann peser. Malgre ki nou ti a swete ki *gear store*, ti a kapab ganny materyalize. Me nou konpran ki zot pe fer zot mye pou sirmont bann lobstak. E nou apresye ki byento pou annan

konstriksyon en pti bazar pou peser ek fermye Glacis.”

Onorab Esparon i azoute “Ki nou vwar ki malgre en pe tar, komansman lannen, *daycare* pou an operasyon. *SLTA* pe rod meyer fason pou rezourd sa sityasyon trafik e danze dan sant Glacis. Proze met lalimyer, laglas ek *crash barrier*, pe ganny fer dousman, dousman dan bann landrwa neserer.

E nou espere ki la avek sa Bidze, ki nou pe al aprouve pou *SLTA*, zot ava akseler sa bann proze pou benefis nou zabitan.”

Mr Speaker Onorab Esparon i dir, “ki proze lakaz 24/24 pou distrik Glacis, i ankor dan difikilte negosyasyon semen. Akoz ansyen Gouvernman in aste en bout later ki anklave pou sa proze prezan.

Nouvo Minister i bezwen antre an negosyasyon pou ganny en bon semen pou kapab arive ariv lo sa morso teren. Me mon swete ki proze *ex-Ferrari*, dan distrik Glacis ki pou konpri 9 *unit* ava enn ki kapab demare, boner lannen prosenn.

I annan plizyer proze, semen ki'n ganny met *on-hold* sa lannen. Akoz mankman finans, parey semen pou al kot lafanmir Hoareau, dan sou-distrik Machabee, ki nou



swete a ganny fer lannen prosenn.

Mon vwar osi sa proze agrandisman semen North East Point, ki osi pa'n kapab konplete akoz problemm *wayleave*.”

Mr Speaker, Onorab Esparon i terminen an dizan ki “Sak sitwayen i devret vin pli pridan, pli responsab anver son depans. Konn balans zot priyorite, e bezwen evit gaspiyaz a tou moman. E ede pou rekonstrir nou pei ansanm.” Mersi.

**(APPLAUSE)**

### **MR SPEAKER**

Mersi Onorab. swivan Onorab Francois Adelaide, silvouple.

### **HON FRANCOIS ADELAIDE**

Bonzour Mr Speaker. Bonzour tou Manm Onorab. Bonzour Minis. Bonzour tou dimoun ki a lekout.

Mr Speaker, yer apre ki mon ti tann Onorab Loze deklare ki i pa ti pou kapab vot lo sa Bidze, enn de dimoun in demann mwan ki sa i vedir? E petet zot dir mwan i petet desizyon parti. Eski sa Bidze pa pou pase?

Mon'n fer zot konpran ki pou 3 mwan Onorab Loze pa'n dan Lasanble, preski 3 mwan e detrwa fwa *US in walk-out*, Lasanble pa'n paralize e nou'n kontinyen travay.

Parey Richard Quest ti dir dan son *interview*, *we've got the mandate and* nou pou bezwen delivre. Bidze ki Minis Finans - Minis Hassan in prezant avek nou semenn pase, a mon avi ler mon'n ekoute, reflexir, enterakte avek lezot dimoun. Swiv bann deba lo bann diferan platform.

An gro sa Bidze i enn ki realis san okenn gran, gran promes. Konpare avek sa dernyen Bidze ki Gouvernman sortan ti'n kit avek nou. Kot nou ti vwar bokou bann gran promes zis pou kontinyen fer krwar ki keksoz, ki zot ti pe serye. Me ler nou ti rod plis lenformasyon nou ti kapab konstate ki ti sete zis promes lo papye me tre pe aksyon.

Nou ti menm konstate ki en ansyen Minis ki ti ansarz Lanvironnman pa ti ni menm azour avek son prop Bidze ki li menm i ti'n prepare. Kot i ti pe rod leklersisman lo alokasyon e i ti pe parye avek nouvo Minis Lanvironnman si sa alokasyon pa ti pou deratizasyon Sesel. Kan ofet i ti en larzan ki li menm i ti abitye mete dan Bidze, sa mon panse pou kontinyen fer realizasyon dan son parti.

E a mon avi sa larzan ti pou al pou bann petet lera 2 pat ki ti pe espere pou donn bal parey zot labitid. Be sa pa'n abouti.

Mon oule dabor remersi Minis Finans avek son lekip ki'n travay tre dir, menm dan en lepok kot lensertitid ti pli aparan ki zanmen in deza arive oparavan.

Menm ki an 2008 ti annan en sok ekonomik. Me i enportan konnen ki sa lepok touris ti ankor pe kontinyelman antre Sesel. Me ki sa enn ki'n fek pase, Lendistri Touris ti'n ganny afekte severman. Kot reveni ki ti pe antre Sesel ti vremen dan en problem e si sa evantyalite ti kontinyen ti pou napa swa, me fer bokou dimoun arete travay, koup saler. Priyorite bann servis ki Gouvernman i donnen zis pou kapab fer sir ki sa pep i ganny tou son bezwen debaz ziska ler son sitasyon i amelyore.

Menm ki i annan en pti group ki pe kontinyelman dir ki *US* ti kit en ta larzan ler zot ti kit pouwar. Realite i vremen lwen avek sa persepsyon.

Mr Speaker sa lekip kot Minister Finans, parey zot labitid pa'n dezapwent nou. Menm si avek ladministrasyon oparavan, parfwa zot ti bezwen obei menm si zot ti konnen ki zot pe al kont zot etik e prensip.

Me la vi ki zot annan enn zot menm, Minis Hassan, mon panse ki zot ava kapab travay dan tout en

lanvironnman pli konfortab, kot zot abilite e leksperyans ava ganny respekite zot ava vremen ganny valoriz e fer Sesel fyer. Lasanble i donn zot tou zot sipor dan sa demars.

Mr Speaker, krwar pa krwar sa ki'n arive le 24 Oktob pa ti en kwensidans. Me en levennman ki ti'n fini ekrir dan plan Gran Met. Kot Seselwa determinen apiye par bokou lapriyer, ti finalman fer sa diferans.

Mr Speaker, sa se sanzman san vyolans. Mon konnen ki in pran bokou kouraz, bokou refleksyon e bokou lasazes. Menm dan bann moman dezespere sa lekip Minis zot pa'n les dezespwar ranport laviktwar lo sa lavolonte pou fer pli byen pou sa pei.

Byensir zot pa'n tousel. Gran Met menm pa'n zanmen abandonn son zanfan, menm dan bann moman difisil parey sa moman.

Ler ou annan prensip dan lavi ou pa tonm pou naryen ditou. Ou reste fikse, konsantre aköz ou konnen ki ou misyon lo sa later. Byensir nou pa pou kapab fer tou, me lesansyel se ki nou donn tou.

Mr Speaker, se sa ki sa tim Legzekitiv i prouve avek Lepep Seselwa dan sa bann moman difisil. Nou konnen ki zot in fer bokou sakrifis, zot ankor pe fer sakrifis. E nou

bann Manm dan Lasanble Nasyonal, nou anvi dir avek zot ki nou vreman apresye zot kouraz e determinasyon. Me nou osi nou anvi fer zot konpran ki nou annan e travay Lezislatif e *oversight* pou nou fer.

Pa ganny nou mal ler nou met presyon. Sa se nou louvraz. Me nou kontan zot, nou apresye zot e nou debout a kote zot pou byennet sa Nasyon.

Mon oule osi remersye tou bann lorganizasyon ki zot in osi aport zot kontribisyon pou ki Sesel i annan en Bidze pou prezant avek son pep. En Bidze ki napa bokou bann gran, gran promes.

Me enn ki tre prometan kot bann fondasyon pe ganny konstri avek tou prekasyon pour ki lavenir, bann striktir i ava ganny batir lo en fondasyon solid e kot nou pa a bezwen lensertitid. Me plito konfyans, garanti dan tou nou bann demars pou fer en Sesel prospere.

I osi enportan pou koz avek nou pep. I enportan pou nou edik nou pep. Donn zot tou fe e laprev ki *LDS* pe travay dir pou anmenn Sesel ver semen programm.

En pep ki edike, i en pep ki progresiv. I en pep ki konpran rasyonnel par deryer tou desizyon. I kapab decide pou li menm, san bezwen

ekout okenn propagann ki nenport groupman i kapab sey vin avek.

I kler ki demars *LDS* pou fer Seselwa re pran tou son lendependans, epanouir e viv en lavi ki ranpli avek prosperite, sa pe vreman fer ditor Lopozisyon. Akoz zot annan rikord pou fer Seselwa reste depandan, vilnerab, per e konfize.

Zot konnen ki tre byento avek sa politik bonmarse, zot lapros diktater, zot lespri dyabolik, zot pou vin pli irelevan e pli fay ki zanmen. Nou vwar sa fenomenn dan Lasanble parmi serten Manm part *US*. Zot nepli konn zot rol koman en Lopozisyon, me zot krwar zot bezwen zis koz mansonz e anvoy bann mesaz dezespwar pou nou pep laba deor.

Dan deba Bidze sel de keksoz ki zot in kapab anpandan e koz lo la, se zis palto Minis e napa naryen dan Bidze pou nou zenn.

Sa i montre nou ki kantite *defagoté* sa parti pe *defagoté*. E zot menm dan Lasanble ki nivo *defagoté* zot in arive. Aret ipokrit, get vre larealite lavi.

Eski zot in bliye ki zot *Leader* in osi ganny larzan palto, R18 mil ki *LGB* ti fer remarke ki fek antre lo son kont? Sa i premye. Dezyenmman, zot dir napa

naryen pou zenn. Mr Speaker, be sa bann spekilasyon zis bann manter profesyonnel ki kapab anmenn sa bann tel agreman.

Sa les pou *Leader* Lopozisyon, akoz mon konnen i annan plis ki 10an servis dan koz lalang. Me pa koman Onorab Gabriel ki fek vini. Amenn ki zot fer kour koz lalang dan zot *Caucus*. Mr Speaker, sa i enkrwayab.

Me sey dir nou, kwa ki zot asosye avek zenn? Minis in dir e la mon repete.

1) 733 *post recruitment*. Eski zenn pa pou benefisye ladan?

2) Nouvo striktir saler pou Sekter Gouvernman, eski nou pa vwar zenn ladan ?

3) Plis efikasite dan Departman Lasante ek Ledikasyon. Eski zot pa vwar zenn menm ladan?

4) Larzan pou renouvle bann striktir sportif. Eski napa zenn menm ladan?

5) bann proze pou benefisye Sekter Lapes ek Lagrikiltir. Eski napa zenn menm ladan?

6) 25poursan *excise tax* pou ganny tire lo loto lannen prosenn. Eski zenn pa roule dan loto nef?

Mr Speaker, si mon kontinyen i annan tro bokou e Parti *US* pa pe trouve.

Mr Speaker, mon demande ki kantite *defagoté* parey Onorab Loze ti dir, zot lizye in *defagoté*. Zot abilite pou rezonnen ou a dir zot napli annan. Ki zot in sitan pri dan mansonz e menm pa azour avek la realite. Mon pa ti zanmen ekspekte ki zot in ariv dan en leta mantal koumsa. Kot zot in sitan dezespere e refizye aksepte realite menm ki i devan zot prop lizye.

Mr Speaker, letan pou arive, ler plis laverite pou demaske zot, eklersi tou zot mansonz e tou zot bann kalonmni. Mon oule ki Seselwa i mazine ki ler sa bann letan i arive, byensir nou pou tann en lot retorik dezespere. Lot kote pou kriye, zot pou anmenn *PNQ* swa Urgent *Question* ki nou pe fer *witch-hunt*.

Me pa tonm dan zot latrap. Lazistis i bezwen ganny fer e Seselwa i bezwen ganny sa ki pou li. "Le konseyer, byensir se pa le meyer." Parey proverb in dir, "donn letan son letan."

Ozordi Lopozisyon i oule akiz Legzekitiv koman bann dimoun ki napa leker pou Seselwa, akoz zot in anmenn sa Prozedlwa pou kennsel trezyenm mwan saler. Mon bann frer ek ser fodre zot konpran byen, Legzekitiv pa'n dir ki Seselwa pa devret ganny

trezyenm mwan saler. Me in senpleman protez bann anplwayer ki pas dan bann difikilte akoz problemm finansyer.

Sa Lalwa pa zis baze lo napa akse avek finans, me i annan osi laspe legal ki serye. Si sa Lalwa i reste parey, bokou anployer pou ganny anmennen Ankour e bezwen forse pey en trezyenm mwan saler. Si ou napa, swa ou annan ou pou bezwen fer fas avek lazistis.

Ou sa pti kontrakter ki pe seye menm dan sa letan difisil, sa Lalwa sispann trezyenm mwan saler pe protez ou. Akoz si nou pa ti'n sispann sa Lalwa, ou ti pou riske ganny anmennen Ankour avek ou bann travayer, akoz ou ti pou'n komet en lofans menm si ou napa larzan.

Ou sa madanm ki annan en *day care*, ou reveni in koupe seryezman. Si nou pa ti sispann sa Lalwa trezyenm mwan, ou ti pou vwar ou travayer pe anmenn ou Ankour e si ou pa ti peye ou ti pou riske kondannen.

Ou sa koup ki'n sirmont tou lobstak *licensing* pou ou komanse e fer en pti biznes *self catering* kot ou pe anploy 3 a 4 travayer. Me *COVID* in fer ki ou bezwen reste fermen. Touris fek komans antre e ou'n kapab kit sa bann

dimoun dan lanplwa. Si nou pa ti pa sa Lalwa sispann trezyenm mwan saler, ou osi ou ti pou ganny anmennen Ankour.

Ou sa investiser ki'n bezwen *scale down* ou biznes zis pou kapab fer fas avek sa sityasyon difisil e mentenir lanplwa. Si nou pa ti pas sa sispann lo trezyenm mwan lapey ou ti pou ganny anmennen Ankour.

Ozordi i fasil pouvwar lekel ki anvi sabotaz sa Gouvernman. Zis gete ki mannyer zot in desann sitan ba. Fer politik popilis avek sa size trezyenm mwan saler zis pou fer Seselwa revolte.

Ozordi parti *US* pe anvoy en move mesaz la deor. Avek zot largiman negativ zot pe met tou Seselwa dan menm sak. Konmsi napa biznes Seselwa ki onnet, konmsi tou biznes Seselwa i mazin zis zot lekor. Me kan nou konnen ki i annan bokou biznes la deor ki abitye donnen. I kler ki ozordi tou target se biznesmenn Seselwa. Mr Speaker, sa i vremen fer lapenn.

Onorab Lemiel in mansyonnen ki i annan en *businessman* nonmen Mr Frichot pe vremen ede dan distrik Anse Royale. Eski sa pa en laprev ki i annan bokou biznesmenn Sesel ki vremen annan en leker imen, e annan bann bon fason fer. Akoz ki

nou bezwen met tou bann biznesmenn Seselwa dan menm sak.

Ozordi mon oule ki tou Seselwa i fer en pti analiz lo lekel sa bann dimoun ki pe dir donn trezyenm mwan saler. Mon poz sa la pou zot kapab reflexir.

Mr Speaker, ozordi mon pa kapab les *Leader* Lopozisyon servi son privez pou kraz bann enportater transpor e dir ki Gouvernman pa devret siport zot dan zot demars. Mon pa konpran mekontan Onorab Sebastien i ete avek sa bann biznesmenn.

Se pourtan i pe mars dan sa menm loto ki sa bann dimoun i enporte. Avan ki ou pe konplent lo sa bann biznesmenn ki fer vini loto, eski ou'n bliye ki laplipar sa bann *businessmen* se bann Seselwa?

Eski ou'n deza asize avek enn sa bann *businessmen* e sey konpran ki ban difikilte ki zot gannyen ler zot pe fer sa biznes? Eski ou'n deza sey antre dan zot soulye?

Zis pou azoute, sa bann dimoun i osi kontribye bokou dan *Consolidated Fund* ki ou pe benefisyé plennman ladan. Ou pe donn lenpresyon ki sa *excise tax* ki pou retire, i pou benefisyé zis enportater, kan ou senserman konnen ki sa benefis pou osi pase lo konsonmater.

Plis ki sa Lasanble Nasyonal in met ou dispozisyon en loto nef, ki sanmenm sa bann biznesmenn in fer vini. Serye ou Onorab. Ou pe ganny apel Onorab silvouple. Esey apresye sa privez. Evite fer bann tel largiman iresponsab ki ou'n fer vizavi sa bann enportater transpor. Me mon ti a kontan ki ou demann zot en senser leskiz.

*COVID* pa le sel fakter ki'n anpes Gouvernman pey trezyenm mwan saler, me laplipar dimoun i konnen ki i annan lezot kondisyon ki'n fer Sesel pa'n anmas tou reveni mannyer i ti a voudre.

Tro bokou dimoun in ganny soutire ler zot in kontinyelman vot larzan e resours sa pep. Koripsyon in en fakter ki'n vreman destabiliz nou pei e ki ankor pe arive an se moman.

Mr Speaker, Sesel in perdi tro bokou larzan anba sa ladministrasyon *US*, ki'n fer nou vin en pei preski vilnerab. La mon site;

\$50 ki *LOTO* ti pou rode  
Nou'n fek tann zafer pa bon kot Ile Soley

Skandal larzan *SBFA*  
Skandal larzan

Proteksyon Sosyal

Skandal larzan simityer  
Skandal larzan kot *SPTC*

Skandal later kot Eve Island

Skandal later kot *Zone*  
endistriyel Providence

Skandal later Parti Lepep  
Skandal later *STC* avek  
Parti Lepep

Tousala Mr Speaker, i montre ou ki kantite larzan Sesel in kapab perdi anba Gouvernman *US!* Zis pou met a latansyon Seselwa, dan sizenm Lasanble, zis kot en Departman, *LDS* ti kapab fer lekonomi R120milyon, aköz nou ti pe vreman kler tors.

Mon'n tande ki sete sanmenm sa bann larzan ki ti a pe met dan lanvlop gri pou program deratizasyon bann lera 2 pat ki sa Minis Lanvironnman ti pe sey eklersi lot fwa.

Vwala ki kantite labi ki ti egziste anba sa sistenm *US*, ki ozordi zot pe fer nou krwar i kontan malere. Koman en Manm lo Komite Defans, Lentelizans ek Sekirite mon oule dabor felisit tou bann zofisye Lapolis, pou sa bann bon travay remarkab ki zot pe fer tou dernyerman.

Menm ki parler nou'n anpaye avek serten, aköz mon krwar dan donn bon servis pou lakominote san okenn preferans, san okenn malis e san okenn faver.

Mon panse ki nou kapab travay e re etabli sa lapros Lapolis zanmi kominote. Mon oule osi remersye bann zofisye dan Lapolis, ki'n ganny bann

nouvo rol dan sa lafors. *Espérons* ki zot deservi nou pei avek tou loner posib.

Lasanble Nasyonal pou sipor zot aköz nou valoriz zot rol ki sitan enportan dan demars pou retourn Sesel koman sa rezon ki napa personn ki par lao Lalwa.

Ler mon lo sa size Mr Speaker, koman reprezantan Baie Lazare, mon oule dir avek Komisyoner Barbe ki nou distrik in pare pou akey en nouvo stasyon Lapolis tre modern. Nou bann devlopman ki pe annan dan nou distrik e dan nou zalantour pe fer ki nou bezwen modernize.

Nou pa'n zanmen *cool* voras, nou'n esper nou tour e la ki se nou Kordgard ki pli ansyen dan nou rezyon, moman in arive pou nou ganny nou nouvo lenfrastriktir.

An se moman nou pe diskit lo nouvo alokasyon pou konstri sant lasante Baie Lazare e si sa i materyalize, Lapolis i ava ganny sifizaman lespas pou lagrandisman sant Lapolis, menm fer en pe barak pou asiste bann gard ler zot dan lafors.

Mon oule senserman felisit nou lafors Ladefans e zot bann partner pou sa traver serye ki zot pe fer e pe vreman aport rezilta. Ozordi keksoz in sanze, tou departman ki

annan sa manda pou asir sekirite sa pei pe aprezan konn zot balizaz. E sa pe ede ki kordinasyon i vin pli efikas e ki sa Departman tou zofisye i ganny valorize e rekonnet.

Mersi Prezidan Ramkalawan pou ou bon gidans dan ou reorganizasyon sa Departman e sirman ou pe rekolte bann bon rezilta. Lepep pe note.

En gran mersi osi pou nou Vis-Prezidan. Mersi pou tou ou sipor kontinyel, menm si sa pozisyon in fer ou legliz ou pti partisipasyon da ou *band* prefere. Mon panse ki ou pe ganny bokou satisfaksyon dan sa ki ou pe fer pou ou pei e pou tou Seselwa.

Mr Speaker, mon pa pou mank sa loportinite pou siport mon koleg Onorab Arissol. Phillip Arissol e Onorab Andre dan sa demars pou asiste SFRSA Anse Boileau.

Nou'n fer en vizit semenn pase e mon oule met avek Legzekitiv ki sa stasyon laba i merit latansyon irzan. Si nou anvi zwenn Seselwa pou zwenn sa lafors, menm lafors Lapolis, mon panse ki lanvironnman i devret pli ideal.

Parey in dir, MNA Arissol in fini ganny en donater. Zis fasilite sa prosedir e nou avavwar en nouvo stasyon tenny dife Anse Boileau e sa pou

sirman ed Baie Lazare si i ariv okenn evantyalite.

Minis in vin fran e brav pou eksplik nou vre sityasyon nou lekonomi. In fer nou mazine ki nou pou bezwen kontinyen avek sa disiplin, kontinyen ede pou siport nou bann reisit ek sikse.

Parey in dir lekonomi Sesel ti dan en kantite problem. Me apre en lannen disiplin, lekonomi pe refer e byensir i lo bon semen.

Ozordi nou pe demande pou nou tou ede pou fer lekonomi vin plis soutenab. Nou ganny fer konpran ki sa parkour difisil, pli difisil i aprezan deryer nou e nou pou bezwen inifye pou kontinyen batir nou pei.

Nou pa kapab permet okenn akt sabotaz par okenn endividi akoz se Sesel antye ki pou perdi lafen dizour. Nou bezwen dekouraz sa pratik pou anmenn politik dan travay Gouvernman parey US pe demande. Sa i aktyelman iresponsab e i pa pou ede bouz sektor Gouvernman pli devan.

Ozordi ladministrasyon pe met lanfaz lo en sektor piblik pli efikas, pli profesyonnel e i pou kapab delivre selon lekspektasyon sa pep. Mon souvandfwa ganny konplent par mon bann zabitan ki fristre e parfwa dekouraze apre ki'n gaspiy bokou letan dan trafik. E ler i



ariv dan biro Gouvernman i ganny tourn dan bann dezapwentman e sa i fer zot dekouraze. Swa bann travayer i trenn lipye lo bann keksoz ki annan solisyon imedyat.

Prezidan Larepiblik pe kontinyelman demann tou travayer Gouvernman pou fer zot travay parey si zot ti fer zot prop biznes.

Me sa fraz i kontinyelman ganny mal enterprete par parti Lopoziyon e sa i fer ki serten bann aktivis ki ankor pe travay dan Gouvernman pe kontinyen trenn lipye.

Mon santi rekonforte ler Minis in dir ki lannen 2022 *RBM* pou ganny enplimante. Sa se *result based management*. Sa pou sirman ede pou evalye atraver sak Departman e donn en nide lo ki mannyer departman pe travay. *Espérons* ki sa i ava komanse o pli vit posib e sa i ava vremen ed sekter piblik.

Sa Gouvernman i bezwen delivre selon lekspektasyon son pep. Mon konnen ki sa tim egzekitiv i enn ki Sesel zanmen in deza annan oparavan. Mon krwar dan zot kapasite menm si parfwa mon konstate ki i annan en bann o zofisye dan Gouvernman, ki anvi vwar sa Gouvernman *fail*. *Espérons* ki egzekitiv pe gete, zot konnen e byento zot ava met en lafen avek sa pratik.

Mr Speaker, sa Bidze i annan bokou lespwar. Pa zis mon ki'n dir. Bokou Seselwa konpetan dan diferan pozisyon konpetan in avoue ki sa Bidze i enn ki pou montre bokou lespwar. Zot pli eksite e zot pe met tou zot pwen konsern pou ki sa bann bon pwen parol i ava ganny mete an realite, pou byennet sa pep.

Mon osi konstate ki bokou dimoun la deor konpran ki sa Bidze i enn ki tre prometer. Menm si i annan detrwa pti faktor ki zot pa dakor. Nou konpran zot konsern, nou konpran zot lekspektasyon, nou konpran zot fristrasyon.

Me nou bezwen dakor pou get tou keksoz dan tou son diferan dimansyon e adopte sa fason fer pou ki i pa zis en Bidze avek bann lide popilis, grandyoz me i enn ki pou vremen anmenn prosperite pou nou Nasyon.

Dan sa travay nob ki nou pe fer, les mon reasir pep Seselwa ki nou bann dimoun ki debout lo prensip. E se sa kalite ki pou fer nou reste solid, relevan e reste popiler.

Mr Speaker, nou tann bokou lanons dan bann Sekter Lapes avek Lagrikiltir. Mon panse ki sa pou vremen anmenn bokou benefis pou nou epi Sesel. Bokou lenfrastriktir pe ganny konstri. Me mon ti a kontan

dir avek Lotorite Lapes Sesel, pa bliy Baie Lazare dan sa demars pou moderniz bann fasilite lapes.

La mon oule osi remersi klip *Casino Club Liberte* pou tou zot lasistans e sipor ki'n permet nou kapab met en pti bazar pou nou bann peser servi. Peser Baie Lazare i anvi fer pli byen e kontribye plis dan sa sekter. Nou annan plizyer lide dan fer pwason vin pli abordab dan nou distrik.

Mon lans en lapel avek Lotorite Lapes Sesel pou vin get nou dan Baie Lazare. Nou osi annan potansyel e nou osi nou anvi benefisyen.

Sa ki mon konpran se ki lannen 2022 pou ganny deklare koman lannen pou promot lapes tradisyannel. En vreman bon nide ki pe promot sa travay nob e sitan enportan.

Mr Speaker, lo size lagrikiltir, mon kontan ki tou dernyerman Legzekitiv in angaze avek sa sekter. Me Minis mon annan 3 pti konsern ki mon pou bezwen met devan ou e sa i merit latansyon irzan.

Mankman materyo debaz dan *store* lagrikiltir. Sa pa akseptab. Mon'n aprann ki i annan en *Revolving Fund* ki ed sa sekter fer vini sa bann materyo. Me ki nou'n konpran ki sa *fund* zot souvan ganny problemm ler pou ganny larzan

avek Minister Finans. Minis mon demande pou ou met sa koman en priyorite.

Mr Speaker, seksyon agrikol i en sekter ki dinamik. Mon pou demann Minister Finans pou osi met resours imen avek resours finansyel imedyatman pou remedye problemm delo Val D'En Dor. Delo ti napa, delo in annan. Basen ti napa, basen in fer. I mank nou zis resours imen, avek resours finansyel pou ki nou ava kapab donn sa bann fermye zot delo e zot a kapab ogmant zot prodiksyon.

Lo lot kote mon santi mwan soulaze akoz ozordi Seselwa in vin en Nasyon matir, edike, travayan e entelizan. Fini sa letan kot bann bater latet pou profit lo lafebles, met lafreyer, detri fabrik en Nasyon. Ekspoz nou pe avek bann sibstans destriktif ki detri nou lazene e nou lafors travayer avek en sel bi pou zot kontinyen reste o pouvwar e zour lasyer sa pep.

Eski zot lo lot kote latab, bann Manm avek tou zot konesans, mon panse laplipar zot, zot kretyen, eski zot pa'n santi naryen an term imen keksoz pou amelyore tre byento dan pei Sesel?

Akoz ki zot refize edik Seselwa lo bann bon keksoz ki sa Bidze pe anmennen. Laverite pa kapab kasyet.

Byento tou laverite pou ganny devwale.

Mon konnen ki laverite pou sirman liber tou bann Seselwa ki ozordi pe ganny anbete e pe ganny servi koman bann politik bonmarse ki sa bann swadizan *leaders* iresponsab pe fer.

Minis Hassan in anons bokou ki Gouvernman pe fer pou amelyor bann kondisyon pou permet tou biznes epanouir. Mersi Minis Hassan mon konnen ki Gouvernman i kolekte e konekte avek son pep e byensir zot pou delivre.

Tro bokou letan bann lenfrastruktir ...

### **MR SPEAKER**

... Onorab 30 minit. Ou a *move* lo konklizyon. Mersi.

### **HON FRANCOIS ADELAIDE**

Ok. Mr Speaker, parey ou toultan dir e ou tou toultan gid, ki Lasanble i devret vin bann lenstriman lape. Annou senm lanmour dan plas lannen, annou met lord kot i annan dezord. Annou met laklerte kot i annan fernwar. Annou met lakor kot i annan diskord, annou pardonn nou prosen ki me mazin mal lo nou.

Mon konnen sa bann dirizan ki Sesel i swazir dan sa moman difisil pou enspir nou pep lo bann bon valer moral, liminite, respe, disiplin,

tolerans e rezilyan. Annou mazin nou demen, annou mazin nou lavnir. Annou mazin nou zanfan e annou mazin nou fitir.

Ki Gran Met i kontinyen vey lo nou, gid nou dan bann bon desizyon. Protez nou kont tout sort dimal e okenn lafors ki kapab fer nou dimal. Sov nou dan bann danze kan nou pa espekte e akord nou la laserenite pou kapab viv anpe.

Mr Speaker, mon remerci ou pou donn mwan laparol, pou mwan kapab adres Minis e Sesel lo size sa Bidze 2022. Mersi.

### ***(APPLAUSE)***

### **MR SPEAKER**

Mersi Onorab. Onorab Norbert Loizeau.

### **HON NORBERT LOIZEAU**

Mersi Mr Speaker. Bonzour Mr Speaker. Bonzour Minis. Bonzour tou Manm e Lepep Seselwa a lekout. Mr Speaker, mon promet ou sa voyaz mon pou vreman kourt e bref akoz bokou in dir par lezot Manm.

Mr Speaker, le 24 Oktob, 2020, premye fwa Sesel ti ganny li son premye Prezidan elekte, demokratikman. Mon repet demokratikman. Seselwa dan son gran mazorite ti decide pou vir latab anba lao. Parey sa gran santer

Jahkim i sante dan son sanson ki dezyenm lo *chart*, 'Anba lao'.

Aprè 43an, *SPUP/SPPF* ozordi *US*, Lepep Seselwa ti dir zot in fatige. E Seselwa ti dir avek Prezidan Ramkalawan pran labar dan sa moman difisil e kree sa nouvo Sesel ki nou'n espere pandan plizyer lannen.

Dan en peryod grav, difisil, kritik Prezidan Ramkalawan, byen vantar (pa zwe bliy li, Mr Speaker) ti trous son lanmans semiz e i ti dir avek Lepep Seselwa, "*Bring it on!*"

Premye keksoz ki i ti fer koman en Prezidan responsab, se asire ki i annan stabilite politik dan nou pei. Fer sir ki lord ek lape i rennyen parmi nou pep. I annan in apel li diktater, kan Prezidan Ramkalawan zanmen in deza fer okenn koudeta, ni pran pei par lafors. Ni esper personn fil en gran baton avek li, parey bann Prezidan oparavan ti fer. I ti esper son tou arive, demokratikman i ti fer li.

Dezyenm keksoz ki Prezidan Ramkalawan ti fer sir, i ti fer sir ki tou dimoun, tou son pep i ganny vaksinen. I ti fer son devwar pou li al negosye partou avek bann Pei Zanmi pou lasistans pou li kapab ganny vaksen e wi, i ti

kapab ganny 25mil doz pou li kapab komans avek.

Menm si annan Mr Speaker, ti fer politik pou dekouraz dimoun pou pa pran vaksen. Aprè selman zot ti al pran an sou sekre. Ki byen ki zot in al pran an sou sekre Mr Speaker, akoz nou ti pe donn tou dimoun. Sa mendev pa ti marse.

Ozordi Mr Speaker, ou kapab mazine nou parmi bann premye pei dan lemonn, mon kapab dir premye pei lo Kontinan Lafrik kot mazorite son pep in ganny vaksinen. Konmdir Onorab Gill, Onorab Simon Gill. "*It's wonderful! It's beautiful Mr Speaker!*"

Dezyenm keksoz pli enportan ankor ki Prezidan ek son Gouvernman ti fer, se ouver nou epi avek lemonn. Kot bokou pei ti trouve ki Sesel i en landrwa *safe* pou zot sitwayen kapab vin pas en bon vakans. E bann *flight* ti komans antre enn par enn.

Ozordi viziter pe antre sorti dan nou pei e bomaten Mr Speaker, ler mon debout lo balkon anler kot mon reste anba Trois Frères, mon vwar *cruise ship* pe antre. E premye pou antre lo por se Le *Bellot*. Mr Speaker mon pou koz Franse en kou la.

Byento Le Bougainville pou antre, *MS Europa, Europa 2, Island Sky, Silver Explorer*. Mr Speaker lalis i long. Ek sa

aktivite dapre ki mon pe ganny en konpran, pou ganny arive ziska apepre Mars, avril sa lannen. Lannen prosenn.

Mr Speaker, avek louvertir pei napa ki annan pa ti dir;

“Pa ankor ler!”

“Fodre *lockdown!*”

“Nou pep pa ankor *reach herd immunity!*” Me nou Gouvernman pa ti ekout zot. I ti *move on* avek son plan.

Ozordi Mr Speaker, avek sa louvertir nou Lendistri Touris in re pran. E nou lekonomi in osi re pran e lezot biznes osi in kapab rekomans zot bann aktivite, rekomans zot loperasyon. Avek sa mouvman pozitiv ki’n arive Mr Speaker, bokou dimoun ki ti lo *URS* in kapab antre dan en lanplwa formel e i annan ki’n menm fer zot prop biznes. Se sa ki nou koman Gouvernman *LDS* nou apel ‘larg lanmen Seselwa.’

Se koumsa Mr Speaker, ki nou *LDS* koman en Gouvernman nou met larzan dan pos Seselwa. Nou, nou pa vin fer dimoun vin depandan lo sistenm, nou ed dimoun pou li travay.

Sa i fer Mr Speaker, ki pei in kapab anmas larzan kot Minis Finans in kapab vin avek en Bidze devan nou Lasanble Vandredi pase. Si nou ti ekout se zans Mr Speaker, nou pei ti pou ankor

lo son zenou parey zot ti kite an Oktob 2020.

Mr Speaker, ozordi nou pe viv dan en nouvo Sesel. Kot Gouvernman pe enkilke en koutim travay dir. Kot asize lese fer, viv lo *welfare* in vin en keksoz lepase. Akoz nou anvi nou pep i pran zot responsabilite.

E Minis Hassan dan dernyen Bidze ki i ti fer 2020 an Oktob, i ti repet sa mo byen for. “Pran nou responsabilite !”

E Prezidan Larepublik, Mr Ramkalawan a tou repriz ki i ganny en sans i dir avek Lepep Seselwa, “Pran zot responsabilite!”

Nou anvi en pep ki prodiktiv. *LDS* i anvi ki nou pe i pran tou loportinite ki vin a zot laporte. Parey Prezidan Ramkalawan i kontan dir, “se lesyel ki ou limit!”

Mr Speaker bokou desizyon *tough* e difisil in ganny pran pandan sa lan ki Prezidan Ramkalawan in pran labar. I pa’n bann desizyon ki’n satisfere tou dimoun, me dan sa moman difisil nou’n bezwen fer li pou benefis nou pti pei Sesel.

Si Gouvernman *US* ti’n pran sa bann desizyon parey oparavan, ozordi Sesel pa ti pou dan sa leta ki zot in kite lannen pase.

Mr Speaker, Minis Vandredi pase in prezant avek

nou en Bidze byen kalkile. En Bidze ki napa plas pou okenn labi, parey ti annan pandan lepok Gouvernman *US* ti o pouvwar. Kot larzan ti ganny plas dan bann fason endiskre, kot apre gro lanvlop gri ti monte desann *State House*, partaze. Enn ler ou a dir ti annan en pye larzan deryer *State House*.

Kot Departman Ladefans ti ganny servi pou kasyet larzan akoz zot larzan pa ti pas trezor, me ti al direk lo en kont *Barclays* e *Nouvobanq* dapre mon konpran. Yer mon ti pe ekout en pti *video*, ler *FPAC* ti pe fer en *hearing*, mon'n tann sa parol, Mr Speaker.

Dapre konpran se koumsa ki *inducement allowance* pou bann Minis ti ganny partaze sa letan pandan ki Gouvernman *US* ti o pouvwar. Kot lanvlop ti monte desann *State House*. Petet taler Minis i a pas en pti git lo la, i a frot en pti git obor i a eksplik pli byen, si vreman ti annan.

Ozordi i annan pe demande si mazorite Seselwa ki'n vot sanzman in vwar zot dan sa Bidze? Zot pe osi demande si sa Bidze pe vreman pe met larzan dan pos Seselwa? Mr Speaker, mon anvi demann en keksoz. Eski met larzan dan pos Seselwa se met en gro sonm larzan dan Bidze apre partaze avek

dimoun parey *US* ti fer? Non Mr Speaker, nou a pa anvi retourn koman en *welfare state* ankor.

Nou en Gouvernman ki fer keksoz diferaman. Nou en Gouvernman ki kree loportinite travay pou tou dimoun. Se sa fason met larzan dan pos Seselwa. Nou anvi en pep ki travayan, se sa, sa nouvo Sesel Mr Speaker, ki nou koman en Gouvernman *LDS* avek Dirizan, avek Prezidan Ramkalawan i anvi kree e i anvi vwar.

Zot dir Mr Speaker, i annan in dir ki Gouvernman *SPUP/SPPF* ozordi *US* in akonplir bokou. Mr Speaker, pa manti, zot in akonplir bokou.

Be wi Mr Speaker, zot in pran bokou osi. Zot in pran en ta e menm tro. Sa ti ganny dir Mr Speaker, par Per Fondater li menm – Mr Rene ler i ti dir avek Onorab Simon Gill, ki” zot in get zis zot lekor.”

Kot later in ganny partaze parmi dalon, oubyen bann ki byen konekte apre vann pou milyon. Kan i annan nou frer Seselwa ozordi ni en lapel later i napa. Kot later konble ti ganny partaze parmi dalon. I annan ki dir in ganny bann ptipti bout. Tranpe, apre vann pou milyon Mr Speaker. Ozordi avek sa kalite labi ki'n arive, *Zone* endistriyel in vin

en nespes dezord koumsanmenm.

Kot parti o pouvwar Mr Speaker, ti fer biznes avek Gouvernman. Zis en legzanp, kot Parti *US* ti lwe landrwa avek *STC*, kot zot ti fer en fortin. Apre ler nou ti komans mansyonnen dan Lasanble, zot ti taye e vann avek sa menm *STC* pou de milye roupi ankor. Apepre 18milyon.

Mr Speaker, Mr Rene ti annan rezon ler i ti dir ki "zot in get zis zot lekor." I annan pe dir ki zot leker i fermal manner Gouvernman dizour pe fer avek Seselwa. Mr Speaker, be mon demann zot, be zot leker pa fermal ler zot ti pe donn bal dan larzan Lepep Seselwa? Eski zot leker pa fermal ler zot mazin tou sa bann Seselwa ki'n bezwen kit Sesel, al viv aletranze apre ki zot lavi ti pe ganny menase dan zot prop pei?

Mr Speaker, eski zot leker pa fermal ler zot get sa bann ki'n vin viktim eroin e sa in ariv pandan ki zot ti pouvwar? Sa ki pli fermal a Mr Speaker, se nou lazenes ki'n pri dan sa fleo. Tandis ki i annan ki pe fer de milyon par detri sa bann zenn.

E sa ki pli sagrinan ankor Mr Speaker, se ler zot abiz sa bann menm zenn. Serten parti politik i abiz sa bann menm zenn, sa bann men viktim pou fer zot desann

anvil avek en plakar kot Lorloz pou en biye R500 oubyen en pti boutey *Jameson* dan kwen miray pou zot zis vin fer tapaz, vin annwi dimoun. Sa ki ti merit fer zot leker fermal.

Mr Speaker, ou konnen akoz zot leker i fermal. Akoz zot nepli kapab donn bal dan byen leta parey lontan. Zot nepli kapab viv dan sa lopilans parey i annan ki ti pe viv ler zot pouvwar ti dan zot lanmen.

Mr Speaker, mon kontan lafason ki Minis in prezant Bidze Vandredi pase. Minis in vin fran. I pa'n fer okenn gran promes kot apre i pa pou kapab delivre. La i fer mwan mazin kantite lakaz ki pou ganny konstri lannen prosenn. Avek kontrent bidzeter, Gouvernman pou konstri 37 lakaz. Mon konnen i pti git Mr Speaker.

Nou dan distrik Bel Air, dapre ki mon'n gete, nou pou ganny 4 lakaz lannen prosenn. I fay Minis, i pa ase. Me selman mon konpran ou pe sey ou palto dapre grander latwal ki ou'n gannyen. Ou pa'n fer parey *US*, kot plan lekol i pli gran ki later, parey lekol La Rosière, parey pe arive avek lekol La Rosière.

Mon anvi dir Minis mersi pou sa 4 *unit*, me fer sir ki dan Bidze 2023 i annan alokasyon pou konstri sa 18 *unit* ki *PS* Choppy ti anmenn mwan vizite anler kot *Daycare*. Kot

vye *daycare* anler kot vye stasyon milisya. Zis promet mwan sa Minis. Fer sir ki nou ganny sa 18 *unit*. Akoz Bel Air later i rar, tou nou later i dan rezerv. Nou'n ganny sa pti morso, annou fer li.

Mon rekonnèt Mr Speaker, ki dan Bidze i annan alokasyon pou konstri e menm agrandi serten semen lo Mahe. Mon anvi dir avek Minis ki mon espere, i annan larzan pou fini lagrandisman semen Curio Road ki ti ganny promet depi 2017 ler Prezidan Faure ti vin vizite. Zis en morso ki'n fer Mr Speaker. In pas 4an, 5an.

Sa menm semen Mr Speaker, in komans vin danzere avek lakantite transpor ki servi sa semen e osi lakantite pyeton ki servi sa semen osi pandan lazournen. Pa fer parey *US*, esper letan i ariv en aksidan pou i zot vin fer en keksoz. Annou fer li la pou nou *prevent* aksidan. Prevansyon i pli byen.

Mon krwar ki dan Bidze i annan larzan pou refer bann lenfrastriktir sportif dan pei. Minis ti'n plis ki ler aköz nou bann lenfrastriktir sportif ti pe tonm an rin. Palais des Sports, basen naze, nou bann stad e bann lezot *venue* sportif dan distrik i merit ganny en *complete makeover*.

Mr. Speaker la i fer mon mazin laplenn ek *court* Sans

Souci ki dan en leta deplorab pandan plizyer lannen.

Mr Speaker mon panse ki dan Bidze pou *sport* i annan en alokasyon pou devlopman *sport*. Sirtou pou siport bann lakademi. *Sport* dan distrik e osi bann ki prefer li ek leker avek lanmour pou zot *sport* ki zot kontan.

Mr Speaker, la mon pe koz lo lakademi, i fer mwan mazin Mr Jeffrey Payet, Che Dorasamy, Bernard Mathiot, Gervais Waye-Hive pou nonm enn de. Bann dimoun, Mr Speaker ki pe donn tou pou lev lazennes dan *sport* ozordi. Siport zot Minis, aköz sa bann dimoun koumsa pa reste bokou isi Sesel.

La avek abolisyon CSR i ekstrememan difisil pou zot kapab *operate*. E annan pe mazin retir zot dan okenn *sport* aköz sipor napa, lankourazman napa e zot pe osi santi ki zot pa pe ganny apresye.

Mr Speaker, mon anvi dir Minis avek abolisyon CSR, mon pa konnen ki nou Gouvernman ki mekanizm i annan pou seye pou ed sa bann dimoun. Aköz sa bann dimoun i fristre. Alors Minis, pran sa ka o serye.

Mr Speaker, mon konpran lakoler sa bann dimoun, se aköz Gouvernman *US* pa i enterese avek zot. Alor nou koman en Gouvernman



annou pa repet menm fot. Annou donn zot sa lankourazman pou zot kapab kontinyen ed nou zenn epanouir e al pli lwen posib.

Mr Speaker, i annan pe fer dimoun krwar li ki napa lasistans sosyal pou bann dimoun ki dan bezwen. Kan dan Bidze i annan larzan ki'n ganny bidzete pou ASP. Me selman sa ki merit gannyen a gannyen e ou a fer prosedir ki fodre fer.

Mr Speaker, mon konnen ki bann prosedir pa fasil. I koumsa aköz ti annan tro bokou labi dan lepase. Kot menm si ou pa ti bezwen ou ti gannyen. Menm dimoun ki'n mor ti ganny peye.

In annan dimoun ki lo URS, pa ti konnen zot lo URS. Sa Minis ti vin dir devan personnelman devan. Selman larzan ti pe gannyen peye. I annan larzan i ankor kot lanplwa Mr Speaker. Personn pa annakor vin serse ziska prezan.

Mon demande oli sa bann dimoun? En ler ou a krwar nanm, Minis ti dir. I krwar petet i annan nanm ki ti pe ge ganny peye. Mr Speaker, ou vwar? Se koumsa sa ki en Gouvernman sosialis i fonksyonnen. Se koumsa, zot donn pti kwiyer, zot, zot pran par ganny kwiyer.

Mr Speaker, ti annan en gran nwar ti en gran sosialis

dernyen fwa mon pe koz ek li, konmela i en kapitalis. I ti dir mwan si en dimoun dan son letan zenes i sosialis e kan i ariv dan son 50 pou al lo 60 i ankor sosialis, i annan en problem. Mr Speaker, swa i malad, swa i fou, swa in gate Mr Speaker.

En Gouvernman LDS, dirize par Prezidan Ramkalawan i mazin diferaman. Sak sou i konte aköz nou'n fer en profi i pa vedir ki nou bezwen donn bal ladan.

Granmoun i toultan dir Mr Speaker, anmas en pe pou letan dir. Mr Speaker, mon anvi felisit nou Lapolis pou bann travay ki i ape fer. Ozordi nou annan en Lapolis ki annan konfyans dan zot travay e zot santi zot fyer koman en polisye. E nou'n vwar lo televizyon kantite bann ka ki Lapolis pe *deal* avek.

Alors mon panse Mr Speaker, ki dan sa Bidze ki Minis pou prezante ozordi, sa alokasyon ki Lapolis pou gannyen i a kapab ed zot pou ogmant en pe zot *manpower*, pour ki nou bann dimoun dan lakominote a kapab trouv patrol, avek bann ka vol ki pe arive e nou bann dimoun, sirtou nou bann dimoun aze a santi zot konfortab.

An konklizyon Mr Speaker, mon anvi dir avek

pep Seselwa, swa bann ki'n tik anler oubyen bann ki pa'n tik anler. Sesel i nou pei, si Sesel i tonbe nou osi nou pou tonbe. Pa les politik diviz nou. Sanzman i en keksoz ki bon. Reste dan en sel sistenm i pa toultan bon. Akoz sanzman in arive, annou aprann viv ek sanzman.

Mon anvi dir avek tou Seselwa pou annan pasyans. Granmoun i dir pasyans i geri lagal. Progre pa pou ariv ozordi pou landmen. Nou'n met konfyans dan Prezidan Ramkalawan le 24 Oktob, les li travay. Zot a ziz li ankor dan 5an e zot a deside si in byen travay oubyen si in mal travay.

Mr Speaker, mon anvi remersye bann zabitan Bel Air ki'n fer mwan konfyans dan sa travay difisil. Koman *MNA*, mon anvi dir zot ki mon pou fer li byen san preferans pou person.

Mr Speaker, vi ki i reste mon 5 minit, permet mon pas en pti mesaz ki Onorab Kelly Samynadin, Onorab pou Au Cap in dir mwan dir avek bann dimoun Au Cap. Mr Speaker, Onorab Samynadin i dir, "Mon pour dekrir diskour Bidze 2022 konman enn ki siksesiv, prometan e optimis.

2021 i en lannen kot nou bezwen atrap lanmen ansanm konman en pep e fer bokou sakrifis pou nou kapab ariv kot nou ete ozordi. 2022 pour

en pa pli an avan dan sa parkour siksesiv ver rekonstriksyon nou pei. I pa'n fasil e i annan ankor bokou lobstak pour nou sirmonte. Larout i ankor long, me avek en Gouvernman dirize par nou Prezidan Wavel Ramkalawan, nou navir pou reisi ariv abor, malgre movetan.

Bann nouvo mezir ki pe ganny antreprann i bann ki fran e onnet e non pa bann fo promes pou vin bat latet Seselwa. Nou Gouvernman in vin fran devan sa pep e eksplik sityasyon nou pei parey i ete pour ki Seselwa i kapab konpran son vre leta, e akoz ki serten desizyon difisil in bezwen ganny pran pour ki a lafen nou, nou ava kapab zwir fri nou sakrifis.

Malgre, Mr Speaker i dir "malgre 2021, lo nivo distrik nou'n bezwen met bokou proze lo *pause* akoz kontrent bidzeter lo nivo nasyonal" - I dir - "i kapab asir zabitan Au Cap ki 2022 pou en pti pe pli prometan avek sa logmantasyon dan alokasyon Bidze pou Minister Gouvernman Lokal.

I menm dir, "menm si in annan koupir, 2021 nou'n nobou kapab re sirfas laplipar nou bann semen dan bann sou distrik, enstal *streetlights* kot i nesese malgre i annan serten mankman ki nou ava

amelyore lannen prosenn.”  
Onorab Samynadin i dir.

Pou fini Mr Speaker, i dir “mon konnen ki avek fermtir URS, bokou nou bann zabitan ti trouv zot san en lanplwa, me avek sipor Minister Lanplwa, ki tou le semenn ti pibliy lalis diferan *vacancies*, mazorite zot in reisi kapab ganny en plas travay. E byensir, en kantite in reisi kapab fer sa anba led ek gidans e mon laport i toultan ouver pour mwan ed zot dan nenport fason ki mon kapab.”

Onorab Samynadin i dir i pe demann” ek zabitan Au Cap e pep Seselwa an antye, pou kontinyen azir responsab e rezilyan dan tou sa ki zot fer. Ki swa dan zot letid, dan zot lanplwa, dan zot depans, dan zot lanmizman. Nou bezwen konsyan ki lavi pa fasil” i dir.

“E i annan ankor en kantite progre pou nou fer afen ki nou a kapab ariv ver nou destinasyon. Ver en Sesel pli meyer, pli modern. Nou tou nou annan en rol pour zve anver byennet devlopman nou pti Sesel. ”

Onorab Samynadin i fini par dir,

“Ki lape Bondye i reste touzour avek zot e ki i kontinyen konble zot avek lasazes ek kouraz.” E Onorab Samynadin i dir zot

“Mersi bann dimoun Au Cap pou siport li dan sa parkour difisil ki i ladan.”

Mr Speaker avek sa mon dir ou mersi pou donn mwan sa pti sans pou entervenir.

**(APPLAUSE)**

**MR SPEAKER**

Mersi Onorab. Nou a pran poz la e nou a kontinyen deba e nou a retourn ller.

**(BREAK)**

**MR SPEAKER**

Byen. Nou a apel Onorab Gervais Henrie pou son lentervansyon.

**HON GERVAIS HENRIE**

Mersi Mr Speaker. Bonzour tou dimoun. I annan egzaktaman 18 mwan depi ki Sesel ti rikord son premye ka COVID-19. Nou tou nou ankor rapel bann diferan kriz dan nou lavi koze par laparisyon sa viris, ki serten ti dekrir koman zis en pti *flu*.

Letan parti Linyon Demokratik Seselwa LDS ti vin devan Lepep Seselwa e demann nou pou fer li konfyans pou diriz Sesel atraver eleksyon zeneral Oktob 2020, LDS ti onnet dan son lapros vizavi sityasyon COVID-19. LDS ti dir ki i pou fer zesyon sa sityasyon son priyorite.

I ti dir ki i pou imedyatman komans travay pou asire ki tou sitwayen i sen e sof e ki nou lekonomi i rebran. *LDS* ti dir i pou servi sa sityasyon koman en loportinite pou transform nou lekonomi. In reste senser avek sa promes.

1) Nou sistenm lasante pann *collapse* malgre sa kriz lasante piblik.

2) Gouvernman in asir stabilite sosyal par fer sir dimoun in reste dan lanplwa, annan en saler lafen dimwan e lasistans sosyal in kontinyen pour bann pli vilnerab.

3) Gouvernman in zer byen rezerv pei. *Net Reserve*, setadir larzan ki nou kapab depanse atraver Labank Santral in sorti \$395milyon an Zanvye 2021 pou ariv 468 milyon Vandredi pase. Nou osi bezwen osi rekonnèt to lesanz ki'n sorti R21.50 pour en \$1 an Zanvye pou desann R15. E

5) Gouvernman ti anbark lo en program disiplin pou mye zer resours finansyel pei par koup tou labi e gaspiyaz ki posib, san fer ditor sa ki dan bezwen.

Mr Speaker, sa 5 pwen ki mon pas lo la i pli gran lakonplisman ladministrasyon Prezidan Wavel Ramkalawan pandan sa dernyen 12 mwan. Son ladministrasyon in reisi fer Seselwa aret per *COVID-19*. Ozordi plizyer aktivite

ekonomik in rebran dan nou pei. Nou pe viv. Nou pe debrouye.

Lekol, bann biznes e tou biro i ouver. 18 mwan depi ki Sesel ti konfirm son premye ka *COVID-19* sityasyon sa pandemik global in ganny normalize isi Sesel. Eski nou pran kont, ki mannyer sa i en gran lakonplisman pour en Pti Leta Zil? Bann Pralinwa avek Digwa, pou pli apresye sa obzervasyon ki mon pe fer aköz zot, zot in ganny en lot sans.

Wi dan sa prosis, 125 nou frer avek nou ser Seselwa in perdi zot lavi. Mon prezant mon senser senpati avek tou bann ki'n perdi en pros aköz *COVID-19*. Me ozordi nou bezwen salye desizyon brav nou Gouvernman pou reouver nou pei pour ki koman en Nasyon nou demontre nou rezilyans. In en prosis long.

Souvandfwa difisil aköz sakrifis e travay dir ki bokou pe bezwen fer. Me in tir nou dan en leta kriz pou anmenn nou dan en leta normal, avek ankor zis enn de pti restriksyon ki nou oblize swiv. Se avek sa menm lespri ki Bidze 2022 pe ganny prezante e mon oule eksplike koman.

Mr Speaker, nou sorti lwen. Osi lwen ki le 14 Zanvye sa lannen, Lazans nouvel *Reuters* ti publiye pou fer lemonn konnen ki nouvo

Gouvernman *LDS* ki ti'n fek ganny elekte apenn 3 mwan ti riske pa kapab pey travayer servis piblik apartir dezyenm kar lannen 2021, si Minis Hassan pa ti kapab vwar \$212 milyon pou bous sa gran trou dan son Bidze, fouye par Gouvernman avan, Gouvernman *US*.

Lopozisyon ti okouran sa problem tre byen. Alor se sa rezon, zot ti anmenn en kanpany asarnen kont program vaksinasyon, opoz reouvertir erport e proteste ki program *FA4JR*, *URS* e *part rental* parmi lezot program ki ti pe koz lemorazi finansyel nou pei i arete.

Zot ti oule Sesel i senny an mor e ladministrasyon Prezidan Ramkalawan i mor an nesan. Si ou dir ou annan Sesel aker, ki mannyer ou kapab swet otan dimal pour li e pour son zanfan?

Nou sorti lwen Mr Speaker. Lwen aköz nou'n erit en leritaz finansyel katastrofik ki son bann sikatris ankor pe bezwen ganny trete atraver Bidze 2022. La mon mazin sa aryeraz R1.034bilyon dan *tax* ki Komisyon Reveni Sesel (*SRC*) pa ti ankor kolekte disi Zen sa lannen.

Bann rekomandasyon ki ti ganny fer avek ladministrasyon avan lo bann mezir ki bezwen ganny pran pou asir soustenabilite Fon

Pansyon me ki zot pa'n fer naryen avek menm ler zot ti ganny averti ki sa fon pou *collapse*.

Kontra ki ladministrasyon avan ti sinyen avek *AMSA* pou program dyaliz e ki pe kout par lao 10 poursan Bidze total Minister Lasante.

Det *Air Seychelles* a en sonm R95.5 milyon ki *taxpayers* pe bezwen rann *Etihad*. E konpansasyon pour kontaminasyon delo La Misère san ki nou oubliy konpansasyon pour bann zabitan Cascade aköz masin koltar e Baie Ste Anne Praslin aköz zenerater elektrisite *PUC*.

Mr Speaker, letan mon regard lentansyon sa Bidze, i kler pou nou tou ki rezonnab aksepte ki nou lekonomi i ankor pe rekipere fas a pandemik *COVID-19* ki ankor pe ravaz lemonn antye, aköz son lenpak negativ lo sistenm ekonomik e finansyel.

Me mon rekonforte ki Minis Hassan in met lanfaz lo progresyon nou lekonomi dan lavenir atraver bann linisyativ ki pou anmenn plis krwasans pandan mwayen term dan Lendistri Tourizm, Lagrikiltir, Lapes e Lekonomi Ble, Sekter Finansyel e Lekonomi Nimerik.

Sa ki pe port atansyon i konnen ki sa i kontinyasyon en deklarasyon dan Bidze 2021. I kler, Mr Speaker ki

vizyon Prezidan Ramkalawan se pou enplimant bann lobzektif kler ki pou transform Sesel ekonomikman. Nou pe komans vwar sa enplimantasyon.

Permet mwan eksplike. Mon'n al fouray dan bann diskour Prezidan Ramkalawan pour son larepons Bidze koman Dirizan Lopozisyon depi 2017 ziska 2020.

Sa enn de legzanp ki mon pe al donn zot i demontre ki mannyer in touzour annan bann lide ki pou fasilite sa transformasyon ekonomik, en obzervasyon ki plizyer medya enternasyonal in osi fer lo li apre son gran viktwar elektoral an Oktob 2020. Pour Bidze 2017, Prezidan Ramkalawan ti dir e mon site ;  
“Mon demande ki Gouvernman i pran son responsabilite pli serye dan sa ki konsern bann biznes ki anba son responsabilite lo lapar pep Seselwa ziska zour i annan privatizasyon”.

Sa ki nou'n antann anonse dan diskour Bidze 2022 Mr Speaker, i se ki “Gouvernman in aprouv Prozedlwa lantrepriz piblik ki ekspekte ganny prezante devan Lasanble Nasyonal boner 2022. Sa nouvo Lalwa pou fer sir ki i annan bann nouvo obligasyon ki bann lantrepriz piblik pou bezwen swiv e ava ed Komisyon ki siperviz bann

lantrepriz piblik *PEMC* fer son sipervizyon dan en fason pli efektiv.

Pour Bidze 2018, Prezidan Ramkalawan ti koz lo pri lavi. I ti dir i en size ki en priyorite absoli pour nou dan *LDS*, akoz i enn bann demann pli for ki sorti kot Lepep Seselwa. “ I ti dir, ki rediksyon pri i mezir ki pou anmenn benefis imedyat pour tou dimoun avek tou sekter nou Nasyon. I ti eksplike ki si nou kapab fer li arive, son lefe pou pli enportan e pli repandi ki donn en logmantasyon lapey.

Sa ki nou'n antann anonse dan diskour bidze 2022 konsernan pri lavi i se ki, in annan en performans remarkab dan *STC*, ki egziste pou asire ki pri komodite i reste abordab, 8 apre mwan ki son nouvo *Board* in ganny apwente.

Minis in dir *STC* pe ekspekte fer en *savings* R40 milyon pour lannen 2021. Kanpanny *Recommended Retail Price (RRP)* *STC* in redwir pri par 7 pousan dan bann komodite dan kategori 1. *STC* pe osi dir ki son bann pri i 33 pousan pli bon marse konpare avek bann lezot laboutik.

Bidze 2019, Prezidan Ramkalawan ti dir in ler pou Gouvernman annan en Lazans pou regard e konsevwar tou bann proze nasyonal e mazer

dan pei, kot bann Arsitek, Enzenyer e *Quantity Surveyors* ki anploye dan servis piblik i travay avek plis sinerzi. E ki Lasanble Nasyonal ti aprouve semenn pase? *Seychelles Infrastructure Agency Bill, 2021*.

En nouvo Lazans ki anba Bidze 2022 pe resevwar en alokasyon R480 milyon 178mil. Touzour dan son larepons Bidze 2019, Prezidan Ramkalawan ti koz lo nesosite donn lespwar bann zenn dimoun ki fek antre dan lanplwa, e meyer saler pour bann profesyonnel Seselwa.

Zis en lannen apre ki in vin dan lofis, nou vwar son ladministrasyon anons en *loan* avek en to lentere 5.5 pousan avek en peryod repeyman ziska 30 an pour bann profesyonnel kapab aste en *condominium* atraver en program finansman avek Nouvobanq.

Sa menm group dimoun pou byento benefisye avek en nouvo striktir saler pour sekter piblik ki pou enkorpor tou zot *allowances* dan zot saler. Sa a osi ed tou travayer akse *loan* pli fasilman, an vi ki labank pa pran kont *allowances* ler zot pe konsider aplikasyon *loan*.

Finalman, Mr Speaker apre ki dan son larepons pour bidze 2020, Prezidan Ramkalawan ti ensiste ki

larzan ki pe al depanse i bezwen prodwir rezilta dan tou domenn e ki nou bezwen ganny valer pour larzan.

Dan Bidze 2022 tou le 4 pilye program *result based management* pou ganny enplimante an antye.

Lefe ki ladministrasyon avan in tate pou enplimant sa program dan son totalite depi 2013, in met servis piblik en kantite retar, letarzi e lese fer in rantre san oubliy mank kontrol ki'n en katalis pour koripsyon.

Mr Speaker, sa ki mon oule demontre, i se ki depi avan eleksyon 2020, Prezidan Ramkalawan ti annan en vizyon ekonomik pour Sesel.

Diskour apre diskour in etal son Polisi ekonomik, en vizyon ki met lanfaz lo en fondasyon ekonomi ki fonde atraver regilasyon, konsiltasyon e modernizasyon parey Dirizan Zafer Gouvernman in soulinyen.

Alor pour ou ki pe demande ki annan spesifikman dan sa Bidze pour mwan? Larepons i senp. Sa Bidze pa enn pour okenn endividi. Me i pour tou Seselwa. Sirtou zenerasyon fitir parey letan ki nou pe viv ladan i egzize. Sa Bidze i annan lentansyon rekonstrir fondasyon ekonomik Sesel, pou ki i vin pli solid ankor.

Enn kot prodiktivite i

lanbisyon tou travayer. Kot nou lekonomi i konpetitiv. Kot nou annan preski 100 poursan lanplwa. En lekonomi kot nou Roupi i reste for. Saler i konpetitiv e avek nou larzan lafen dimwan nou kapab aste plis komodite e osi servis. Kot akse avek *loan* i abordab e avek letan retour lo *savings* i rantab.

Wi, i tre fasil pou met lanfaz lo lefe ki an 2022. Pou napa logmantasyon dan saler pour bann travayer servis piblik.

Pou napa logmantasyon dan *allowance* pour *long service*.

Pou napa ogmantasyon lo kontra bann travayer ler zot konplet zot kontra e pou napa konstriksyon otan *social housing*.

Sa i bann benefis personnel e direk pour sa ki ti pe espere - wi. Eskize ki i sa pa pou arive an 2022. Rezon i akoz i pli enportan la pou batir en lekonomi solid e rezilyan, an ka sityasyon COVID-19 i retourn parey avan. Zisteman yer swar Minister Lasante avek sipor Legliz e Lapolis in sonn alarm ankor.

Olye reponn a lekspektasyon bann endividi, sa Bidze pe adres nesesite nou sosyete. I pe ankouraz linovasyon e kreativite. Prepar nou pli mye pour letan difisil ouswa letan dir, kondir

granmoun. Epanouir sak Seselwa pou pran son responsabilite. Asir lagrandisman lekonomi. Asire ki biznes e komers i agrandi. Adres linegalite ekonomik dan nou pei. Asire ki i annan loportinite ekonomik ki zis pour tou dimoun e mentenir en standar ledikasyon e lasante pou lit kont lapovrete.

Mr Speaker, san en lekonomi pou napa en Nasyon fyer. Mon rapel en fraz ki ti kree par James Carville an 1992. Carville ti en stratezis dan kanpanny eleksyon prezidansyel kandida parti Demokratik Leta Ini, Bill Clinton.

Fraz ki Carville ti evante i en pti term, me ki ziska ozordi i annan bokou relevans, sirtou ler mon ekout diskour Minis Finans, sa fraz i dir "*It's the economy, stupid!*" Ki sa vedit dan konteks Sesel, Mr Speaker?

Lo premye nivo i konsern sektor piblik. Sa Bidze pe asire ki Sektor Piblik i kontinyen devlope e delivre bann program pour piblik Seselwa, formil bann Polisi, Regilasyon avek Lalwa, siport lanplwa, donn kontra, siport konstriksyon lenfrastruktir nasyonal e donn servis kominote biznes e piblik an zeneral.

Lo dezyenm nivo i konsern sektor prive. E se la



kot Lopozisyon pe ganny gran difikilte pou konpran lentansyon sa Bidze. Gouvernman pe met an aksyon sa teori ki sekter prive ki moter lekonomi. Koman fasilitater, Gouvernman pe donn otan loksizenn pou sekter prive pou li relanse e grosi.

Letan Minis in anonse ki dezormen biznes ki pe fer ziska R1milyon par lannen pou pey selman 15 pousan *tax* biznes e sa ki pe ganny plis ki R1 milyon pou aprezan pey 25 pousan lo zot profi, ki sa i vedit? Nou ekspekte ki bann pti e mwayen lantrepriz i fer plis lenvestisman dan teknoloji e lekipman e osi lantrennman pour zot travayer avek bi amelyor prodiktivite.

Nou ekspekte ki lapey e lezot benefis pour travayer i amelyore e zot anploy plis dimoun. Nou ekspekte vwar plis lenvestisman dan kominote kot sa bann biznes i baze.

En kantite loportinite pe ganny kree, Mr Speaker. I responsabilite sak antreprenner pou sezi sa bann debousman. An Zen 2021, Gouvernman ti donn tou endividi e biznes en amnesti, kot zot ti ganny 6 mwan apartir mwan Zilyet pou eklersi tou aryerez *tax* zot ti annan, par ganny en

rediksyon lo peyman lentera avek penalti ki'n akimile.

En legzersis ki ekspekte anmenn en reveni 30 a 35 milyon Roupie pour pei. Touzour an Zen, Lasanble ti aprouv ratifikasyon *African Continental Free Trade Area* pou permet biznes Seselwa ganny akse avek en marse 1.2bilyon dimoun atraver kontinan Lafrik.

An Out, ti annan lansman *the Seychelles Chapter of the Comesa Federation of Women in Business* e louvertir son lofis isi dan batiman *Independence House Annex*. Sa linisyativ pe ofer bann antreprenner Seselwa, Seselwaz partikilyerman en platform nimerik pou mye promouvwar zot prodwir isi e lo kontinan lafrik e vin pli inovativ.

Pli boner sa mwan, Lasanble Nasyonal ti aprouv lamannman dan *Lalwa Companies Act and Registration of Association Act* ki donn en amnesti bann lakonpanyen domestik avek lasosyasyon pou zot onor zot bann obligasyon e soumet rapor anyel, kont odite, peyman anyel e okenn peyman zot in ganny retar avek ziska Zilyet 2022.

Gouvernman pa'n aret la. Atraver Bidze 2022, i annan plizyer alokasyon bidzeter kot bann akter dan

sekte prive ki serye i kapab benefisyè e an retou anmenn plis prosperite dan pei.

En sonm R1.53bilyon pour program lenvestisman kapital. R11milyon pour renovasyon bann diferan lenfrastruktir sportif.

R20 milyon pour bann pti proze kominoter lo nivo distrik. R50 milyon pou sibvansyon to lenterè lo bann *loan SME* ziska R3milyon. E Gouvènman pou osi garanti en bond lavalè R150milyon dan premye kar 2022 pou asiste Labank Devlopman Sesel, pou donn *loan* sa bann sektè kle pou ede dan sa transformasyon ekonomik.

Alor Mr Speaker, atraver sa Bidze Gouvènman pe ankouraz dimoun dan tou kous nou popilasyon ki i pe deservi, pou pran bann lopòrtinite i pe met a zot lapòrtè. I pe dir ou, organiz ou e reklanm ou par dan sa transformasyon ekonomik ki i pe prezant ou avek.

Nou ver i lanmwatye plen, olye lanmwatye vid. Nou pa bezwen anbet ou avek okenn tenm nasyonal ouswa tenm bidze. Pa en liv pou donn en tit sa. Nou bezwen aksyon. Sa ki pa kapab bouz de lavan akòz i pann tann Minis nonm en tenm, demerd li dan son regresyon.

Si nou pran legzanp, Mr James Lesperance, en zanfan

Mont Buxton. Kot i ti konmansè? Kot in arive ozordi? Se sa lespri lantreprenarya, inovativ e lepanouisman endividi ki nou anvè vwar plis Seselwa adopte.

Par egzanp, ler ou tann Gouvènman pe koz lo revitaliz lendistri kannel, evite tonm dan bann negativite Lopoziyon.

Sa ki ou dwatet pe fer, si ou en investiser potansyel se apros bann Lotorite konpetan e rod leklersisman lo bann size parey ;- landrwa kot ou pou ganny akse avek sa matyer premyer, lenfrastruktir ou pou bezwen, sours finansman, konsey bann eksper e resours imen.

Valer lendistri kannel an 2018 enternasyonalman ti vo \$760.2 milyon e ant sa lannen ziska 2026 i ekspekte agrandir par 2.2poursan. Alor, akòz Sesel pa devret reklanm en bout dan sa lendistri enternasyonal?

Mr Speaker, se sa lafason mon ti avè krwar en Lopoziyon responsab ti pou analiz sa Bidze. Pou regarde ki mannyer nou kapab travay ansanm dan lenterè Sesel, olye reste pri dan ideoloji partizan. Swa nou bouz devan ansanm. Swa nou reste kaye kot nou ete.

Mazinen bann defi ki nou pe fer fas avek koman en pti leta zil i pli gran ki nou parti,

menm nou politik amater ki nou'n esey souliny sak laliny sa Bidze avek. Politik nepli zis konsern konfli. Me i osi la pou kree ase lagreman, konstri en pon pou ed nou travay ansanm dan en fason pli prodiktiv.

Sa Mr Speaker, i fer mwan rapel en konversasyon mon ti fer avek Dirizan Lopozisyon dan en *taxi* an sortan kot nou lotel Lonn pou al lo Erport pou retourn Sesel an 2018. Mon ti dir li ki ler in arive kot nouvo zenerasyon politisyen i merit tonm dakor lo serten size bipartizan dan lentere Sesel.

Son larepons lo Bidze 2022, ti en moman apropiye pour li koz avek en menm lavwa ki nou, e demande ki nou rod sa ki meyer pour Sesel dan domenn ledikasyon vi ki i en edikater.

I ti osi en moman pour li koste e ed nou pei sirmont son difikilte vizavi lalit kont drog, e denons okenn deklarasyon ki dir ki bann *escobar* i kapab deklar lager dan pei, olye apiy nou bann zonn avek fanm dan liniform ki pe konbat kont drog lannwit e zour.

Letan ou asiz dan sa premye sez laba lot kote latab, i en gro responsabilite ki demann annan en bon *set* zouti pou desarz sa responsabilite. Kot i byen, pa kanmi pou aplodi. Kot i mal,

pa per pou korize. Kan i neser, pa ezite pou korpere.

Demann nou lekor aköz Dirizan Lopozisyon in vir son ledò lo komite *Platinum*, refiz tou lenvitasyon sorti *State House* e absante dan tou levennman nasyon ?

Koze deor i se ki i pa enterese ede rekonstri Sesel aköz i pa pou la pour lontan. Laranzman i se ki zis avan eleksyon Prezidansyel 2025, i pou ganny met de kote e forse sed laplas avek en Dokter ki anvi vin Prezidan.

Mr Speaker, mon rapel an 2018, Prezidan Ramkalawan ti aksepté ki lavwa Lopozisyon ti'n ganny reflekte dan plizyer desizyon e rekomandasyon Bidze. Me la pour 2an konsekitiv, pour Onorab Pillay tou keksoz dan Bidze i mal e in ganny mal planifye. Ki an realite se en lensilt pour bann profesyonnel dan Minister Finans.

Lannen pase par egzantp i ti al osi lwen e prevwar ki avek labsans *FA4JR* pei pou perdi 12.5poursan reveni dan koleksyon *income tax*, ou swa R82milyon. Ki Lerop ti pou reste fermen pou 7 mwan e alor ti pou napa touris pou retourn Sesel kantmenm erport i reouver e ki si nou aksepté *Grants* sorti Lenn avek Lasin, Gouvernman *LDS* ti pou pe vann pei avek sa 2 Nasyon.

Okenn sa bann prediksyon pann vin vre, aköz sa ti senpleman deklarasyon en politisyen fristre. I domaz ki en zenn politisyen parey li in les li ganny antrenner dan politik negativ, partizan e non-konstruktiv.

Mr Speaker, mon rekonnèt bann propozisyon konkret ki Onorab Lemiel, son *Chief Whip* in fer dan son lentervansyon e mon swete ki plis diskour bann *MNA US* ti koumsa aköz zot annan en rol pou zwe dan rekonstriksyon nou Nasyon.

**(APPLAUSE)**

### **HON GERVAIS HENRIE**

Avan terminen, Mr Speaker mon ti a kontan fer sa seri rekomandasyon avek diferan *stakeholders*. Ki rol *FPAC* koman en Komite Lasanble Nasyonal, i elarzi anba Konstitisyon pou li annan en pli bon rol *oversight* dan preparasyon e enplimantasyon Bidze Nasyonal. Ki *Transparency Initiative Seychelles*, i elarzi son rol pou enkli *budget tracking*.

Ki en kad legal i ganny drafte pou regulariz relasyon Gouvernman avek sa bann platform swivan *CEPS*, *SCCI* e *SIFCO*. Sa a permet Gouvernman annan plis *oversight* dan depans lo bann

alokasyon bidzeter ki i pe donn sa 3 antite ouswa lorganizasyon ki afilye avek zot anvi ki sa i larzan *taxpayers*.

Ki Gouvernman i re vizit rol *ESA* e *SIB* dan menm lespri ki *STB* i aprezan form parti Minister Tourizm pou asir plis efikasite. Ki Gouvernman i etidye posibilite *merge Seychelles News Agency* avek *National Information Services Agency, NISA*.

Gouvernman i fer li mandatwar ki tou *MDAs* ki sarz piblik pour en servis, i oblize annan en masin *point of sale* pou donn opsyon zot kliyan pou pey avek en kart labank.

Ki Gouvernman i konsider lentrodiksyon *tax return* pour bann endividi osito ki koman parti reform nou sistenm *tax*. Ki Gouvernman i kontinyen travay pou etabli en liniformite dan rezim *tax* pour tou lakonpanyen, ki a osi anliny avek standar enternasyonal.

Ki Gouvernman i met an plas en sistenm kominikasyon ki pli efektiv, pou kominik son mesaz avek piblik Seselwa anvi gran defayans ki *SBC* koman *state broadcaster* pe demontre tou resaman.

Ki tou *MDAs* i ofer en platform efektiv kot zot travayer a pli byen organiz zot e alor kapab met zot konsern

devan *management* atraver pli bon reprezentasyon.

E finalman ki tou *MDAs* i asire ki zot sit *web*, paz *Facebook*, lezot platform rezo sosyal, limero telefonn e adres *email* atraver ki zot kliyan i kontakte zot, i reste azour pou asir en komunikasyon pli efektiv avek piblik.

Dan sa prosen 5 minit ki reste mon Mr Speaker, oule koz briyevman lo mon distrik e fer mon konklizyon. Mr Speaker, mon reste angaze pou travay avek tou zabitan mon distrik. Langazman ki mon ti fer avek zot an 2016 avan mon eleksyon i reste parey.

Mon annan en plan pour Mont Buxton me i pa enn ki mon anvi enpoz lo personn. I mon swe ki nou zwenn kanmarad lanmwatye semen, propoze, diskite, konsilte e agree. Bidze 2022 pe tous tou kous nou distrik ki Gouvernman pe deservi.

Pran bann loportinite ki a ou laporte. Ki swa dan kontra konstriksyon, netwayaz, bann linisyativ dan Lekonomi Ble kantmenm nou distrik pa bord avek lanmer ouswa loportinite dan *Agroforestry* pour bann agrikilter, bann proze lanvironnman, leritaz, kiltirel e tourizm.

Organiz ou e reklanm ou par dan sa transformasyon ekonomik ki ou pe ganny

prezante avek. Kot Gouvernman pa pe kapab delivre ouswa fer keksoz materyaliz pli vit, en group zabitan Mont Buxton in vin ansanm e kree en lorganizasyon non-gouvernmental anba non *Mont Buxton Community Association* e mobiliz fon pou investir dan bann proze ki relye avek lanvironnman, leritaz, kiltir e tourizm.

Mon pe envit ou ki enterese pou zwenn sa lasosyasyon e donn en koudmen.

Mon swete, Mr Speaker donn en pli bon kontrandi lo bann progre dan distrik Mont Buxton dan mon larepons lo diskour Leta Lanasyon boner lannen prosen Bondye pitye si mon ankor la.

An konklizyon Mr Speaker, mon oule reasir tou Seselwa ki nou annan en Gouvernman ki pare pou pran desizyon difisil menm ler i pa popiler. Nou refize pas koman bon boug.

Difikilte ki nou pe fer fas avek, pa pou toultan la. Nou senpleman bezwen annan kouraz e resours pou sirmont zot. Ladministrasyon Prezidan Ramkalawan in ganny elekte pour 5an. I pa pou kapab fini fer tou keksoz dan zis 1an.

Lobzektif Bidze 2022 pour mwan i senp, i pe montre nou en semen kot nou pou

kapab epanouir dan en nouvo fason e repran kontrol nou pei. Bi sa Gouvernman se pa pou *babysit* personn. E sa i anmenn mwan lo en refleksyon.

Konbyen *MNA*  
Lopozisyon ki'n deza travay dan sekter prive ouswa zer zot prop biznes? Mon kapab mazin omwen 3. Onorab Lemiel, Onorab Aglae, Onorab Gill. Me pou larestan zot, zot in swa travay toultan dan Gouvernman ouswa avek parti pou ganny zot bouse manze. E sa rezon ki zot pa konpran ouswa apresye sa konsep leve debrouye.

E zot oule ou pri dan sa *mindset* parey zot e reste depandan lo sistenm depi nesans ziska lanmor Nou, nou pe dir ou fer lekotr. Bidze 2021 pe kree loportinite. En lanvironnman favorab kot tou Seselwa ki enterese - ki enterese pou epanouir, pou ganny en sans egal e zis pou anvole. Profite.

Vwala, Mr Speaker aköz nou promes pou met Roupì dan pos Seselwa e fer Sesel pour tou son zanfan pe ganny lavi. Nou pou reform nou Gouvernman par vin pli transparan e pa per rann kont.

Nou pou reform servis piblik. Nou pou reglemant Sekter Paraetatik. Nou pou donn loksizenn sekter prive e

moderniz nou lekonomi. Se koumsa nou Nasyon pou prospere. Se koumsa nou pou raport ankor laviktwar. Alors pa rat sa sans. Annou koste e fer Sesel pou tou son zanfan. Mersi.

**(APPLAUSE)**

**MR SPEAKER**

Mersi Onorab. Mon a pas laparol avek Onorab Sandy Arissol.

**HON SANDY ARISSOL**

Mersi Mr Speaker. Bonzour Mr Speaker. Bonzour Minis, manm Sekretarya. Nou 2 *Leaders* dan Lasanble, bann Manm Lasanble Nasyonal. Zabitan distrik Bel Ombre, pep Seselwa, bann ki isi e aletranze.

Mr Speaker i annan ek keksoz ki apel manifesto. E manifesto i la pou en parti pou 5an parey nou, nou annan nou manifesto. E mon anvi dir ek zot ki nou pou la koman en parti pou plizyer 5an avek plizyer manifesto.

Me minis in vin prezant Bidze pei e Bidze i pou en sel lannen selman. Alors pa konfiz ou lekor poudir Bidze ki'n ganny prezante i pou la pou 5an. Keksoz i amelyore, swa deteryore dan en pei, me Gouvernman i la pou swiv analize e dirize dan tout transparans pou asire ki i

delivre. Me sa pa vin en kabri dan sak.

Mr Speaker mon ti a kontan lo sa *note* dir avek *US* aret servi sa koze “vann kabri dan sak.” Parski zot annan rikord vann kabri dan sak e zot osi annan rikord vann zonn dan bwat dibwa, parey zot ti fer avek *Marek*. Alors pa koz kabri dan sak. E la mon aprann *Krejcir* pe rod tou bann ki’n pran son larzan. Sel konsey, se zot tou ki’n pran son larzan met en *Tinky Winky* lo zot pou li pa remark zot.

*US* toultan ti servi en tenm pou Bidze, alor zot oule desann kot Lorloz aköz nou napa en tenm pou sa Bidze. Sa bann tenm ki zot ti servi Mr Speaker, ti anbet nou pep. Aköz dan sak sa bann Bidze ti ranpli avek bann fo promes ki ti baze lo tenm;

‘*Data dan Tata,*’

‘*Dezyenm lavil,*’

‘*Tren elektrik,*’

‘*Tinel,*’

‘*3 mil lakaz,*’

Me parkont ki nou’n gannyen ek sa bann tenm ki Onorab Cosgrow, Mr Speaker ti pe rode yer. Vwala ki nou ti gannyen anba sa bann tenm;

‘*Bal dan simityer*’

‘*Bal kot sekirite sosyal*’

E se pour sa ozordi Mr Speaker, i annan bokou papye ki pe ganny servi pou ou ganny en lasistans. Sa pou

montre latransparans aköz ti annan bal kot sekirite sosyal.

Nou’n tann bal kot *STC* dan kart *STC*. Ziska R60mil lo kart e personn pa vin servi.

Bal Ile Soleil parey nou’n tande dan medya,

Bal kot *SFA*,

Bal dan larzan monte/ desann sorti *State House* dan sak vakwa.

Bal kot *FIU*.

Bal dan later Leta Mr Speaker.

Ki en bann in dir zot lib pou revann apre ki zot ti gannyen, me ler ou fer sa ou bar en lot ki’n lo lalis pou plizyer lannen. En bann in ganny later zot kanmarad e i dir byen for ki zot pou kontinyen siport vye ladministrasyon.

Bal menm partou kote Mr Speaker anba vye Gouvernman ki Onorab ti form par ladan.

Kestyon ki mon anvi demande, ti apel anrisir sa oubyen regresi sa? Letan zot ti pe danse anba lavarang Maison du Peuple, letan zot ti pe ganny problem pou ranpli *United Square*, *LDS* ti pe travay.

Letan zot Prezidan ti sorti dan lespas e tonm ater ek en boul *football*, *LDS* ti pe travay. Sa rezilta ozordi. Zot dan Lopozisyon, nou dan Gouvernman.

Letan zot pe apiy Lorloz anba lenfliyans e pe *kick*, *LDS*

pe travay pe rode mannyer pou soutenir sa pep. Sa rezilta en Prezidan elekte. Letan *US* i bizi pe fer *press conference* ek de zournalis, Prezidan pe fer larme rod nou bann Seselwa ki'n ganny konsidere perdi anba zot *watch* e retourn avek lo later Sesel e zwenn zot fanmir. Sa rezilta en Prezidan elekte ek en nouvo ladministrasyon, Mr Speaker.

Me nou Minis Finans, Minis Hassan in vin fran e dir nou laverite lannen 2021 in reste en lannen pli difisil dan listwar nou pei. *COVID* pe kontinyen ravaz lemonn e Sesel osi pa'n ganny eparye.

Son reperkisyon lo nou lekonomi i kontinyen, Minis i dir nou. Me priyorite nou Gouvernman ki enportan ki Minis in dir, se stabiliz nou sitasyon finansyel ek lekonomi.

Ki sa i vedir Mr speaker? Tou travayer ki anvi travay Sesel pe travay, sa i pou fer i pou anmenn plis larzan dan son pos. Ki mannyer i pou anmenn plis larzan dan son pos?

Premyerman i pou ganny en saler ki i ti deza napa.

Dezyenmman, pa pou pey *tax* si i R8 mil e pli ba. E pa bliye sete *LDS* dan son mazorite ki ti propoze sa. Pou pa pey *tax* bann saler pli ba.

Bann lezot benefis ki en travayer i gannyen, par egzanp

son *long service award* pou bann ki deza dan lanplwa, sa osi Mr Speaker, mon ti a kontan *remind US*, sete *LDS* dan son mazorite ki ti rode pou travayer, *US* sa letan pa ti vwar nesosite oubyen vwar li enportan. Me ozordi zot ki pe tay ek pti baba e deklar zot lekor boper.

Ganny *overtime* si ou ankouraze koman en travayer. Ganny ou *service charge* si ou dan lotel, e i osi annan bann lotel ki mon'n aprann Mr Speaker, zot vey ou zanan. Ou manz atab ek ou kliyan e menm ganny en landrwa reste koman travayer.

Pa pey *tax* lo bann *bonus* in anonse si ou arete dan lanplwa tou ou benefis i garanti.

Stabilite finansyel i apele sa Mr Speaker. Eski sa i vedir ki nou pep pe retourn an aryer oubyen pe regrese? Si ou pa'n benefisye ek en trezyenm mwan saler sa lannen, omwen ou saler i garanti.

*Allowance* ou zanan i reste e pou kontinyen peye. Ou vye paran son sekirite sosyal i garanti enkli son *carer*. Nou bann zenn profesyonnel pou kontinyen e pe kontinyen anvole pou al kontiny zot letid.

Tou benefis dezabilite i reste en priyorite. Lalis i long. Kestyon ki mon pe demande,



eski nou pe retourn an aryer oubyen nou pe regrese?

Sa i stabilite ekonomik pei menm dan en moman difisil ki nou pe fer fas avek. Me lefe i reste ki Gouvernman pe vin ek en nouvo fason fer pou en trezyenm mwan saler baze lo performans. E mon siporte, Mr Speaker parski tro bokou labi dan bann landrwa travay.

E pa oublie ki Gouvernman in anonse ki i pe fer en travay pou revwar bann kad saler ek *allowance* ki ou gannnen koman en travayer. Eski sa pa i ankourazan?

Kot ozordi i annan en dezord total dan bann saler ki ganny donner Mr Speaker. I annan i ganny 35 mil, i annan i ganny 45mil, i annan i ganny 80 mil. I annan i ganny 112 mil, i annan i ganny 200 mil e i annan i ganny 5600? Ozordi Direkter, *CEO* sakenn i ganny en saler dan diferan Minister anba menm Gouvernman.

Be zournalis pa rode sa bann? Pou gete si i bon *timing* oubyen pa *bad timing*? Oubyen zis pou politisyen ki ganny targete?

Sa ki enteresan se ki Gouvernman in anonse ki pou annan konstriksyon *condominium* pou nou bann profesyonnel e *Nouvobanq* in dakor pou ofer bann *loan* a en to lentere 5.5 poursan avek en peryod repeyman ziska 30an

pou bann profesyonnel. Eski sa i en pti payot sa? I en foumba sa? I en foutaleza sa? Oubyen in ganny dir *condominium*? Eski nou pe retourn an aryer la oubyen nou pe regrese bann *US*?

Zot pe zwe en zwe, Mr Speaker, zot pa tro konnen ki kalite lakaz, nou pou donn dimoun oubyen ki kalite lakaz dimoun pou gannnen? Be kestyon ki mon demande, anba ladministrasyon *US* ki nou'n vwar ozordi dan Sesel? Seselwa pe reste dan *prefab*, zot pe servi *cement board*, lakaz i an tol i annan e la ozordi *Eco villa* pe entrodwi en nouvo kalite konstriksyon.

Lo nou bann zil nou'n tande i annan *chalet* dan *container*. Be alors eski nou pe regrese, nou pe retourn an aryer oubyen Gouvernman pa konnen ki i pe fer?

Eski pa en Bidze pou lazenes ki swadizan Minis pa'n koz lo la. Ozordi i annan en nouvo souf pozitiv dan nou pei, otour nou bann zenn. Get rezilta *IGCSE* ozordi, get rezilta ki nou *Miss Seychelles* in anmennen apre tou sa letan.

Get nou tim *football score* ki i pe anmennen ozordi pou Sesel. Nou bann zenn syantis, anba gidans Mr Estico, pa rezilta pozitiv parmi nou zenn sa. Kote *Tinky Winky* i antre ladan Mr Speaker? Non, i pa antre.

Pozitivite dan nou pei Mr Speaker. Menm pye Flamboyant in refleri ankor dan Sesel. Sa i montre pozitivite anba nouvo ladministrasyon. Mon swe se ki letan mon pe koz lo *Nouvobanq*, *Nouvobanq* i osi konsidere led swa en pti *loan* pou bann pti biznes ki'n ganny afekte ek *COVID* parey dan Sekter Tourism, pou zot reorganize zot lekòr, zot lotel e pou zot kapab sipòrt zot staff. E mon dir mersi lo lapar bann pti biznes dan mon distrik.

Mon anvì lo sa pwèn Mr Speaker, fer en mansyon osi pou bann zenn ki sorti, ki'n reste dan fwaye e ki zot in ganny zot laz e zot in sorti. Me ki ler zot sorti zot ganny difikilte pou adapte, konekte ek fason fer deor. I annan zenn ki stab dan en lanplwa ozordi, son saler i stab.

Me pou nou get zot avek en lizye pozitiv, sirtou ler zot fer laplikasyon lakaz, pa kapab ou bezwen annan mil zanfan swa en zonn pou ou kalifye en lakaz. Si ou pe travay, oubyen en fanm, oubyen si ou en garson, me ou pe kontribye e ou serye.

Alors mon anvì dir ek sa bann dimoun, get sa bann zenn avek en lizye pozitiv e annou sipòrt zot. Sa i en leokri sorti kot en zenn ki sorti dan Fwaye, Mr Speaker.

Eski sa pa en lakonplisman ki Minis in anonse dan li menm tousala? Eski sa pa bann aki fonde par en Gouvernman Elekte e responsab e ki krwar dan son dimoun? Me eski dan ladministrasyon avan ti napa *condo*, lekel ki ti ganny *condo* sa bann letan, bann profesyonnel? Nou bann zenn? Piti Minis? Piti *MNA*? bann galan, oubyen trwazyenm-az? *Ce qui vivra, verra*.

Letan Onorab Loze i dir nou Mr Speaker, nou sansib lo nou kote, mon anvì dir li get en pe obor li. Akoz letan nou mansyonn *condo*, asma i leve.

Si ou mansyon plantasyon en bann i tir zot revolver, si ou mansyonn semen *Rifned*, bal zonnyon i fannen.

Si ou mansyonn fil perdi kot simityer, maler.

Mr Speaker, la si ou mansyonn Mombasa manman, *chernobyl*. Pe sey tir lapay dan nou lizye anba zot popyer, manman poto i debout!

Oli sa bann swadizan aki ki mon'n tande pe ganny degrengole ki mon'n ganny dir? Eski aki ki pe koz lo la, sete bann privez ki zot ti gannyen e zot in aret gannyen?

Gro saler, *bodyguard* ek en gro loto leta pou sarye

manze koson ladan ! Anmenn diven ek *goodies* en pe partou an servan drayver. Mars ek en *taser* pou entimid dimoun. Sa bann aki ki ou anvi i retournen? Pa les ou ganny anbete ek lanbisyon par en dimoun ki pa'n ganny elekte li menm li.

Sa i vedir ki Gouvernman in ekoute, Mr Speaker. E i pare pou amelyor ou lavi anmezir ki nou lekonomi i fer pli byen. Mon re dir, se pa debout kot Lorloz ki pou met larzan dan ou pos, se pa les ou ganny enfliyans ek drog ek lakol zis pou fer ta bel ki pou met larzan dan ou pos.

Se pa *kick* ek ou latet pe trenn ater ki pou donn ou en lanplwa. Me fodre ou vin en Seselwa for, responsab e pe mazin ou lavenir.

Kestyon ki ou devret pe demande lekel ki pe rod ou pou al fer boufon kot Lorloz? Eski ou vwar li pe debout kot Lorloz ou ? Ki ou gannyen apre sa rankont ? Eski ou ganny plis larzan dan ou pos, ou ganny en pe manze, ou ganny en lanplwa, oubyen zis ou'n kontinyen ganny servi? Mon poz sa la pou bann ki ankor bann zenn, ki ankor pe les ou vin en lot *Tinky Winky* obor Josie.

Me parkont Minis in osi anons bann mezir ki pa popilis, savedir ki fer dimoun fristre swa demann kestyon.

Me en Gouvernman ki'n ganny elekte ek son pep i bezwen vin fran ek son pep, konpare ek en Gouvernman pran baton, ki'n kasyet tou lenformasyon ek son pep.

Sa in fer ki deliberasyon in al dan diferan direksyon. Parey mon'n tann koz *housing allowance* ek *clothing allowance*. Alor kestyon ki mon anvi demande ozordi e mon anvi Minis i klersi nou, lekel ki ganny *housing allowance* Sesel? Eski zis Minis, bann Ziz, travayer etranze ki nou envit zot dan nou pei pou vin travay, bann Seselwa *graduate* ki sorti aletranz ki'n fini zot letid?

Eski tousala i ganny housing allowance oubyen zis politisyen ki ganny target Mr Speaker? Eski i *ok*?

Alors mon pe demann Minis pou met tou kart lo latap pou nou diskite koman en Gouvernman.

Eski i *ok* pou en lakonpanyen anmenn en etranze Sesel, parey *PUC* oubyen *Air Seychelles*. Oubyen *SPTC* oubyen *STC* e lwe en lakaz pou li ziska R45mil. Swa en pilot etranze ki pe reste Eden. E sa i *ok* sa. Personn pa ankoler, ni zournalis pa demann kestyon pou gete si *timing* i bon oubyen pa bon.

Me si en Seselwa ki'n ne Sesel e ganny debarke dan son

pei pou rezon politik, i ganny ofer en plas Minis, i pa *ok* pou li ganny en *allowance* pou lwe en lakaz pou li reste ladan. Li i bezwen reste dan foyer Anse Etoile kot bann garson.

Zis akoz i en politisyen li i ganny targete. E etranze si ou pey en lakaz R45 mil tou le mwan pou li, sa i *ok*.

Me letan enn zot Minis US ti sorti Praslin, eski li i ti vin Minis, eski i ti ganny *housing allowance* li? Zot ti konstri en lakaz pou li letan li i ti pe lwe pou li.

Zot ti fer en semen nef zis pou li, oubyen i ti pran karenja toulezour pou retourn Praslin. Eski nou pe koz anrisir sa, derisir sa oubyen regrese Mr Speaker? Mon poz sa la pou bann ki anvi rode, rode.

Me parkont Mr speaker, si Gouvernman US/SPPF/LEPEP ti'n zer byen nou bann lakaz *Fisherman's Cove* kekfw sa Minis ti ava ganny en landrwa pou li reste. Alor kestyon ki mon anvi demann mon Gouvernman ek mon Minis ki la, eski Gouvernman pe *investigate* oubyen fer en lodit, lo lekel ki pe reste dan sa bann lakaz *Fisherman's Cove* ki ti pou Gouvernman en lepok.

Lekel zot sa bann dimoun? Konbyen zot ki'n aste? Konbyen zot pe lwe? Zot napa zot prop lakaz ki zot pe lwe avek etranze pou en pri

egzorbitan e zot pe abiz lo resours pei?

Fodre mon Gouvernman i vin fran. Eksplik zabitan Bel Ombre pou nou konnen. Konbyen nou bann zabitan ki'n benefisyé? Sa i en legzersis pou nou bann zournalis al rode pou zot konnen si *timing* i bon oubyen pa bon.

*Clothing allowance* Mr Speaker, mon'n tann koz lo *clothing allowance*. Kestyon ki mon demande, lekel ki gannyen *clothing allowance* Sesel? Zis bann Minis ki gannyen? Zis bann Manm Lasanble ki ganny *clothing allowance*.

Ziz pa ganny *clothing allowance* li? Personn pa'n *interview* bann Ziz pou get si zot ganny *clothing allowance*? Travayer SBC eski zot gannyen *clothing allowance* zot? Travayer Lasante zot gannyen *clothing allowance*? SRC, Customs.

En bann i ganny liniform, en bann i ganny larzan pou aste liniform, en bann i ganny liniform pou koud. Eski tousala, i enportan pou nou konnen Minis.

Akoz zot pe gannyen, eski ozordi sa bann nouvo latmosfer i ankor valab pou nou gannyen oubyen pou zot gannyen. Alor mon poz sa la pou Minis, ler ou a ganny sa lenformasyon, kantmenm pa

ozordi ou a vin partaz sa avek nou.

Parey mon'n tann demann kestyon lo fon *COVID*, sa pou mwan i lipokrizi, Mr Speaker. Akoz, kestyon ki mon bezwen demande se konbyen zot in kontribye dan fon *COVID* zot? Oubyen zot ti pe zis swet nou maler?

Tou koze sete kit Erport fermen, anmenn Sesel lo son zenou, tap Sesel kot i fermal, Mr Speaker. Fer sir nou lekonomi i mor! La en fermye in vin fer *U-turn* dan plantasyon e i lir en note ki'n ganny ekrir pou li forse e dir zanmen zot in dir sa. Zot ti dir Mr Speaker, e zot ti konpar nou avek *Maurice* e zot ti dir 'ferm Erport!' *Lockdown!*

Kestyon ki nou bezwen demande ozordi, kote nou ti pou ganny saler? Biznes ti pou fermen, *taxi* ti pou fait, tou nou malad ti pou mor dan lakaz kot zot. Latizann ek manze nou ti pou *google* lo *internet*, me nou ti pou ganny zis zonnyon si nou ti'n ekout bann lopinyon 'latet zonnyon!'

Aprè Mr Speaker, zot a ganny lodas parey en *Tinky Winky* sou, anba lenfliyans drog e pe ki kot Lorloz pou rod lodit, rod trezyenm mwan, fer krwar zot mazin malere. Sa madanm ki sorti Port Glaud pou al travay an prenan de bis parey nou'n tande.

Kan sa madanm ti kapab ganny en pasaz dan sa gro *jeep*, me sa gro *jeep* ti pe ganny servi pou sarye manze koson, apre zot koz lo malere ! Zot bliye letan *LDS* ti pe negosye en logmantasyon rezonnab pou tou Seselwa, *US* ti pe rod R4500 pou zot Prezidan ek zot bann Minis, ki Onorab Cosgrow ti form par ladan Mr Speaker, pou zot prop lekor e zot ti anvi donn Seselwa R450. Apre zot vin koz nou anrisir !

E sa pa ti fini la, Mr Speaker. Sa menm parti *US*, ou konnen ki zot ti fer ? Zot ti anmenn nou Ankour akoz nou ti pe rod en logmantasyon rezonnab pou tou Seselwa. Si vre nou ti'n ekout zot, ozordi nou ti pou parey bann grenwir dan labou.

Me mon anvi dir felisitasyon Minis Hassan ek nou Gouvernman *LDS*. E felisitasyon *LDS!* *LDS* Sesel - parey nou dir.

Lot topik Mr Speaker, laz pou retret in sorti 63an pou vin 65an. Me mon anvi demann Minis, be akoz Minis? Fon pa soutenab. Be oli bann larzan ki nou ti'n kontribye tou sa bann letan dan sa fon? E pa bliye se nou Gouvernman ki ganny blanmen.

Nou ti ganny dir dan sa Lasanble ki travayer Fon Pansyon ti pe ganny *loan* ziska en milyon, eski zot in fini pey zot *loan*? Oli bann *Maison*

*Patanoc* ek bann *Maison Marie Charlotte* ki nou ti ganny montre lo *TV*, avek giz ki nou pe fer larzan e nou ti ganny dir nou pou viv ere *dans le villages dans les nuages!* Ki'n arive avek sa bann *maison* la ? Pa'n fer rannman, tousala pa'n soutenab. Eski nou bann larzan ti ganny servi sak fwa eleksyon pou fer bann bandi, pa oule travay *happy* ?

Letan nou *Seselwa* ti pe travay dir avek bi pou li pran son retret ek son kandyou dan son pos, zot, zot ti pe donn bal dan nou larzan. Minis fodre tousala ou dir, akoz mon Gouvernman ek nou Manm *Lasanble* ki ganny blanmen.

Lekel ki responsab, eski in vin en norm *Sesel*, sa ki pran i zis marse lib e nou tou nou koz lo li, e nanryen pa ganny fer ? Swa larzan ganny rann, swa sezi son byen e vann e rann lepep sa ki pou li.

Oubyen sa pou zis kontinyen pas lo ledò zabitan *Bel Ombre* kot nou gete isi, get laba nou pou vwar zis latet koson. E nou, nou pa aksepte sa. Nou anvi larepons e fodre eksplik *Lepep Seselwa* ki'n arive avek son larzan!

Me apart Minis, sa osi i enportan pou bann *zournalis* al rode. Parey sanson i dir Mr *Speaker*, "*mon'n transpire, ou'n soupire, rann mwan tou sa ki pou mwan mon bourzwa!*"

Mr speaker en bann i sante en lot group i *text* ou, ekrir ou, telefonn, pou kwa? Pou demann ou pou rod tou sa ki pou zot atraver sa *Bidze*. Parski zot santi zot merite.

E i normal sa. Letan nou pe adres bann defi i enportan pou nou kontinyen anmas tou nou sou atraver *tax* oubyen lezot mwayen reveni. Dan lefase in annan tro bokou leskiz an sa ki konsern *tax*. Lalwa pa permet. Lalwa se si, Lalwa se sa, se la. Me pou zabitan napa okenn leskiz.

Kondisyon *license* pou *Sekter Retail*; Tou antite pou bezwen annan en *cash register*. Kan pou pran lefe, Mr *Speaker* mon anvi demann Minis? Opsyon pou pey ek kart labank, kan pou pran lefe ? Tro bokou labi e mon Gouvernman i kontinyen perdi. Bann marsan i deklar perdi, larzan i sorti atraver *bureau de change*, e zot sorti dan en magazen laport kroze e antre dan en laboutik marb. Selman zot pa'n fer profi.

Gouvernman in ler pou met en *moratorium* lo bann *retail outlet*. I annan en lavalas *retail out shop* dan lavil e i dekoul dan bann distrik. Sa i fer ki plis etranze i antre pou vin met ponmdeter lo letazer. In ler pou met en *stop* ek tousala ! Revwar tou sa bann etranze ki pe antre anba *retail*

e donn plas travay nou bann Seselwa !

Nou sa ki nou anvi Bel Ombre se annan plis devlopman an term en *pharmacy, internet café* pou bann zenn servi *internet* pou zot letid swa pou lwazir. En salon *coiffure* pou nou bann zoli madanm ki nou annan, fer zot vin pli zoli ankor. En lofis pou nou pey nou bann *utilities* olye al met laliny dan lavil.

Sa devlopman ki Bel Ombre i bezwen, pa plis *retail outlet*. E letan mon lo sa size mon anvi dir ek Minis ki nou annan en bout later konblaz Bel Ombre, ki nou swete i vin en latraksyon pou zabitan, me pa en konblaz gonaz ek salte.

Me en *auditorium*, pou nou zenn get *film*, get en *show*, en teat, ouswa en aktivite edikasyonnel. En restoran dan laform en bato pirat anvi sa i nou repitasyon. E envestiser nou annan ki'n pare. Zis nou bezwen permisyon Gouvernman.

Kot nou bann zenn fiy ava ganny lanplwa, servi nou kliyan dan zot resanz pirat, e bann zanfan ki vin dan nou restoran a ganny bann pti souvenir a la baz piratri, Mr Speaker. Lev nou distrik, anmenn plis larzan e latraksyon pou nou kliyan dan nou bann lotel enkli nou bann zabitan.

En pti *marine charter* nou osi, kot nou ava asize e regard soley kot pe kouse ver losean. Se sa nou vizyon pou Bel Ombre. Me pa en konblaz ranpli ek salte.

Nou kontinyen anmas larzan atraver *tax* pou ki nou bann proze dan distrik ki'n la pou plizyer lannen i a ganny materyalize. Anmezir nou zoli pei i re fer ekonomikman, sa i ava soulaz bann fanmir ki pe esper semen, parey semen Carpin ki'n la pou plis ki 12an, Mr Speaker. Later in donnen, taso in mete, me konpansasyon pa ankor peye.

Drenaz Mt Simpson, kot Betsy Cameroon, re sirfas semen, sirtou anler kot *AYI* ki i pe espere pou plizyer lannen. Pou nou asiste sa de fanmir ki ros in roul lo zot lakaz, i annan mil an pase. Lalimyer, laglas, ek lezot pti proze dan distrik ki enportan pou nou distrik. Alor koleksyon *tax* i enportan, se pour sa rezon mon pou siport Bidze e siport Bidze i enportan.

Ler mon pe konklir Mr Speaker, Bel Ombre en zoli distrik avek bann zabitan travayan, onnet e responsab, e nou en legzanp pou Sesel. Me nou zabitan i anvi viv dan son trankilite, lape ek sekirite. Me drog i kontinyen ravaz nou kominote, dan tou kwen nou distrik.

Alor mon kontinyen demann tou Lotorite pou travay ansanm pou asir lape ek sekirite mon zabitan sanmenm mon pe siport Bidze. E le profite pou felisit travay ki nouvo ladministrasyon pe fer kont sa lalit anver drog. Me naryen pann ganny dir lot kote. Me mon anvi dir mersi lo zot par pou Gouvernman.

Alor mon ti pou kontan dir mersi mon fanmir, Mr Speaker. Mon zanmi, tou mon zabitan, mon vwazen, mon bann aktivis. Bann biznes ki pe ed nou dan distrik, bann endividi enkli mon *DA* Tahiri Laurencine ek tou son bann *staff* ek tou Seselwa ki pe ede pou fer Sesel vin meyer. Mersi e tou Seselwa ki'n fer nou konfyans. Mon anvi dir zot mersi.

Mersi mon Gouvernman dan zot palto mal *fagoté* pou lapenn ki zot in byen *fagoté* Onorab Loze pou li pran son vaksen e reste an bonn sante ! Mersi mon Gouvernman dan zot palto mal *fagoté*.

**(APPLAUSE)**

**HON SANDY ARISSOL**

Alors mon ti a kontan Mr Speaker, dir Minis mersi pou sa travay, ou ek ou lekip Minis. Mersi Prezidan Ramkalawan ek *Cabinet* pou

kontinyen ekoute e prezant sa ki meyer pou nou dimoun ek nou Sesel atraver sa Bidze.

E pa bliye, letan lopoziyon pe dir sa Bidze pa bon, Mr Speaker, zot tou lot kote enkli parey nou. Nou pou ganny en saler, nou pe kontinyen ganny en saler dan sa Bidze. Alors mon pe demann zot pou lev zot lanmen e amwen aprouv zot Bidze ki san sa Bidze prezante par Minis Hassan.

Avek sa detrwa mo, mon ti a kontan remerci ou Mr Speaker.

**(APPLAUSE)**

**MR SPEAKER**

Mersi Onorab. Nou pou rezwenn pou repons Minis lo Bidze apre midi, 2er. Nou a pran poz la ziska sa letan.

**(BREAK)**

**MR SPEAKER**

Bonn apre midi tou dimoun. Mon ava apel Minis pou prezant son larepons lo Deba lo *Appropriation Bill, 2022*.

**MINISTER NAADIR HASSAN**

Bonn apre midi *Leader* Lopoziyon, *Leader* Zafer Gouvernman, bann Manm Onorab e tou pep Seselwa.

Mr Speaker, le 12 Novanm mon prezantasyon Bidze ti enn ki ti en



kontinyasyon sa stratezi sa nouvo ladministrasyon pou tir nou dan pli gran kriz ekonomik ki nou pei in deza eksperyans e re konstri nou lekonomi.

Mr Speaker, premyerman les mon remersi tou bann Manm Onorab *LDS* ki'n donn zot sipor sa Bidze. E mon pa ti ava pe manti si mon pa ti dir mon vremen dezapwente avek Lopozisyon pou pa donn sipor sa Bidze e Sesel dan sa moman difisil. Me sa i pa sirprenan.

Mr Speaker, sa Bidze i enn ki donn lespwar pep Seselwa, ki nou sityasyon ekonomik pe amelyore. E la les mon dir ankor enn fwa byen kler, aköz i annan bokou ki pe fer bokou propaganda lo sa size. Nou lekonomi pe amelyore, me i pa ankor rekiper 100poursan.

Sa Gouvernman ti annan en plan pou retir nou dan sa trou ki Gouvernman *US* ti'n met nou ladan. Depi ler nou ladministrasyon in vin o pouvwar, nou'n met an plas en stratezik kler ki mannyer nou ti pou re met finans nou pei lo en traze soutenab.

E pa bliye sa plan reform ki bann teknisyen e Minister Finans ek Labank Santral in met an plas, in ganny sipor *IMF*.

Mr Speaker, se sa menm program reform ki ozordi ki

bann Manm Lopozisyon pe kritike. Mr Speaker, mon pou reste toultan slider ek bann teknisyen ki'n travay lo sa program. Kantmenm serten politisyen pa valoriz zot travay dir.

Sa plan bidzeter e transformasyon ekonomik i dan plan *LDS* e pou bann ki pe fer krwar zot pa konnen, zis al get manifesto *LDS* pou eleksyon 2020. Nou pa pe trennen oubyen tat tate parey serten pe oule fer krwar sa pep. Sa Bidze 2022 pe kontinyen konstrir lo sa fonksyon ki Bidze 2021 in etabli.

Nou ti annan en plan aköz nou ti konnen ki ler nou ti vin o pouvwar nou priyorite sete pou stabiliz lekonomi e fer nou de vin soutenab. San sa stabilizasyon fiskal okenn plan ki nou ti annan pa ti pou abouti dan naryen.

Nou fondasyon, Mr Speaker, i bezwen ganny re konstri e sa restriksyon i bezwen enn ki solid e rezilyan. Nou bezwen fer lespas pou ki ler nou ganny tape avek en lot kriz, nou annan sa *buffer* pou tenir e pa plonz dan en lot trou. San en bon fondasyon ou pa kapab konstri en lakaz ki dirab.

Mr Speaker sa i en keksoz ki Lopozisyon pa'n zanmen realize. Sa serk visye kot ler nou pe fer byen nou zis

depanse san kontrol, akoz nou dan bon ozordi san mazin demen e san main le konsekans i bezwen ganny kase. Akoz si non, nou pou vwar nou plonz dan trou de tanzantan.

Labaz sa transformasyon lekonmi ki sa Gouvernman i oule fer, i zisteman pou nou reziste dan en fason ki Gouvernman i vin sa fasiliter. Kot sekter prive i ganny sa loksizenn pou li agrandi e kre larises. Annou pa fer sa fot pou fer dimoun krwar se ki Gouvernman ki kree larises dan sa pei. Sa i en fo konsepsion ki serten politisyen ozordi pe oule fer nou krwar.

Si sekter prive i tonbe, Gouvernman osi pou tonbe. Ler sekter prive i fer byen, Gouvernman i fer byen. Sa i akoz nou bezwen fer desann *tax* biznes. Sa i a donn plis sans bann biznes pou grandi, kree plis lanplwa e kree plis larises ki a ganny distribye dan nou lekonmi.

Mr Speaker, tou bann lekonmi ki'n vreman en sikse in met an plas menm Polisi. Parey *Singapore, Maurice, Dubai*. Mon realize ki parti *US* pa konpran sa, akoz zot krwayans se ki nou depans sa ki ou napa.

En parti ki baze lo bann prensip popilis, en prensip ki zot krwar i a donn zot pouvwar. Sa se zot sel bi.

Mr Speaker, les mwan rakont en realite ki mazorite dimoun pa konnen. Apre zot a konpran akoz Gouvernman ti bezwen pran serten mezir enportan e nesesser.

Le 4 Zanvye 2021, apre tou bann lafet festivite, zour nou ti antre travay mon ti ganny en koud telefonn sorti kot Gouverner Labank Santral, Madanm Carolina Abel, ti enform mwan ki dan kont ki Gouvernman i annan avek sa Lenstitisyon, ti annan zis R14.9 milyon ladan. Sa kont Mr Speaker, i ganny servi pou fer tou peyman Gouvernman.

Mr Speaker, avek en tel nouvel, ki mannyer Gouvernman ti pou kontinyen lo sa menm trazektwar? Nou pa bezwen en syantis pou reponn sa kestyon. Alors desizyon e aksyon ti bezwen ganny pran.

Nou ti dan en sityasyon kritik akoz depans iresponsab par parti *US* pou sey raport en eleksyon. E pli fer lapenn ankor se pandan sa letan zot ti anvi nou *lock down* pei, kontinyen avek *FA4JR*, avek labi *welfare*.

Sa desizyon pou pey saler nenport biznes e nenport ki travayer ti kout *tax payers* plis ki en bilyon Roupie. Eski alors zot demann zot lekor, ki bor Gouvernman ti

pou ganny larzan pou pey tousala?

Sa plis ki en R1 bilyon *FA4JR* e larzan ki Gouvernman ti napa e ti bezwen al prete avek Labank Komersyal lo marse domestik. Akoz Gouvernman ti napa en *buffer* an ka letan dir.

Nou'n annan en kontraksyon ekonomik 9.9 poursan an 2020. Pli gro kontraksyon ki nou epi in deza rikorde dan son listwar. E det Gouvernman ti sorti 58 poursan pou ariv 92.2 poursan *GDP*.

Ler nou ti adopte en stratezi pou donn vaksen nou Nasyon e re ouver nou pei, sa ti montre ki nou ti serye. Sa pa ti zis en desizyon trennen e tat tate oubyen menm lesefer parey en bann in dir.

Sa ti en stratezi tre kalkile. E pa bliye ki nou ti enn bann premye pei pou arive en to vaksinasyon telman eleve e bann premye pei pou ouver nou lafrontyer.

Mon dir gran mersi ki pa Lopozisyon ki ti pe pran desizyon akoz ki zot, zot ti pe dir i tro boner pou vaksen. Alors nou pa kapab ouver lafrontyer pei.

Mr Speaker, listwar in montre ki sa stratezi Lopozisyon ti vreman mal kalkile. Eski nou vreman kapab fer konfyans Lopozisyon? I sanmenm sa Mr

Speaker, ki le 25 Oktob 2020 Lepep Seselwa ti dir ase ek sa sistenm. Sa desizyon ki seselwa ti pran i en gro koreksyon pou sa parti Lopozisyon. Ki pe pas zot letan dir nou ki zot Gouvernman ti sitan bon e pe delivre.

Alors si sa ti vre, ki mannyer alors Seselwa in tir zot o pouvwar e met zot dan Lopozisyon. Sey al fer en pe leson e analiz. Kwa ki'n al mal pou zot? Mr speaker, le 25 Oktob, 2020 Seselwa ti met en Gouvernman ki pran desizyon kan i nesesser, kantmenm i pa neserman popiler. Sa i apel *leadership*.

Dan son letan pli vilnerab, Bondye in anvoy en group dimoun ki mazin pli lwen ki siz ganny pouvwar. In met en group dimoun ki pare pou fer sa ki nesesser pou ranpli sa tour ki Gouvernman *US* in fouye e rekonstri sa pei.

Mr Speaker, kontrerman avek sa kantite negativite ki Lopozisyon in dir lo sa Bidze, i annan bokou Polisi progresiv ki Lopozisyon in zwe aveg e pa koz ditou lo la. Annou pran enn de legzanp.

Dan ledikasyon; Nou pe moderniz nou *curriculum* lekol. Proze pou anmenn *internet* gratwit pou zanfankansenyant kot lekol ek lakour. An plis ki sa plan pou modifye enn de lekol pou bann zanfankansenyant

ki otreman kapab, pou zot ganny enkli dan lansennyman toulezour.

Nou'n osi, pou enkorpor lekol bann zanfan otizm dan lansennyman toulezour. Lekol bann zanfan ki annan bann problem tande in ganny enkorpor avek Minister Ledikasyon.

Tousala i langazman Gouvernman pou anmenn plis lenklisivite dan sistenm ledikasyon. Nou pe repar Sant Kiltirel Nasyonal pou transform li dan en *learning center*.

Dan sekter piblik, konseps *results based management* pou nepli en konseps, me enn ki nou pou enplimante dan sekter piblik, pour ki tou dimoun, depi sa ki pli o ziska sa ki pli ba i rann kont e performen.

Lenstiti Guy Morel pou zwe sa rol *public service college* e la Gouvernman pe donn sa lenstiti en alokasyon R2.5 milyon pou formasyon servis piblik.

Mr Speaker, lo kote saler mon'n dir i annan 733 pozisyon pou rekritman dan servis piblik an 2022. Pou osi annan en revi lankadreman saler pou konsolid bann *allowance fixed* dan saler debaz pou permet travayer sekter piblik ganny akse avek *loan*. E travayer pou ganny peye baze lo performans lafen

lannen dapre son target in agree lo la depi komansman lannen.

Mr Speaker, lo Sekter Lapes, nou tou ki pa aveg nou kapab vwar sa kantite proze ki Sekter Lapes pe antreprann an se moman. Sa Gouvernman pe investir dan bann lenfrastruktir pou benefisyè lapes artizanal. E apartir lannen prosenn pou annan bokou loportinite dan Sekter *Aquakiltir*. Sa sekter i an mouvman.

Lo kote lentere lo *loan*, nou'n vwar ki mannyer Labank Santral pe travay dir pou fer desann to lentere lo bann *loan* e nou'n vwar rezilta sa travay kot to lentere edikatif lo *loan* lakaz, *loan* ki pa demann sekirite e *loan* ki demann sekirite in desann.

Dan Sekter Lagrikiltir nou pe prevwar ki dan prodiksyon lavyann poul sa premye 6 mwan 2021, in montre ki malgre pandemik *COVID-19*, prodiksyon pou klerman depas sa ki ti anrezistre an 2020. E dan prodiksyon dizef sa i 100 pousan lokal.

Mr Speaker, lo kote lekonomi nimerik en letid pe ganny fer par *DICT* e Labank Santral pou determin afordabilite servis *internet* e bann faktor ki determin son kou.

An 2022, bann servis Gouvernman ki pou aksesib *online* pou parey anrezistrasyon bann biznes dan lasosyasyon, aplikasyon ou renouvelman en *license*, deklarasyon *tax* e soumisyon *tax*.

Gouvernman pe pouse pou devlop sa sekter, me sa sekter i enn ki sekter prive i bezwen li osi komans bouze.

Dan Sekter Finansyel, Labank Santral pe kontinyen finans 2 labours tou le an e *FSA* osi pe zwe son rol. E mon'n anonse ki en Fevriye 2022 kou asosye avek serten tranzaksyon ki ganny fer, an servan bann kart Labank pou osi redwir swivan negosyasyon ki Labank Santral in fer avek Lakonpanyen *Visa*.

Dan sekter lenvestisman, pou lannen 2022 dan sa sekter gouvernman in fer 50 milyon pou sibvansyon bann lentere lo *loan* ek anba *SME Scheme*. Gouvernman pe osi garanti R150 milyon pou *DBS*, pou ki donn *loan* dan bann sekter kle pou nou transformasyon ekonomik.

Dan Sekter Lanplwa i annan en Bidze R5 bilyon pou program *Skills Development e My First Job*.

Lo kote *tax*, nou pou kontinyen donn loksizenn sekter prive pou zot relanse e agrandi. Alors apartir le 01 Zanvyè, nouvo *tax* lo profi

biznes pou desann. Nou pe reviz osi sistenm *tax* lo saler pou anmenn plis lazistis.

Mr Speaker, lo kote benefis sosyal dan Bidze 2022, Gouvernman i ankor fer alokasyon en sonm R1.44 bilyon pou bann ki pli vilnerab e i pe revwar alokasyon *weights* pou lasistans sosyal pou bann ki lo pli ba saler.

Sa Gouvernman i konn tre byen ki i pou toultan annan dimoun ki pou tonbe e ki pou bezwen led. Me lapros se ki nou pou akonpanyi ou dan sa moman difisil, ziska ou re debout lo ou lipye e re ganny en louvraz. Nou pa soutir dimoun ki fizikman kapab reste lo *welfare* pou larestan zot lavi. Sa nou pa pou aksepte e mon asire ki mazorite Seselwa i dakor avek sa lapros.

Lo sa size lakaz, la mon oule eklersi en pwen ki bann Manm *US* in bat tanbour lo la pandan sa sesyon Bidze. Mr Speaker, ler Gouvernman pe dir *low cost housing*, i senpleman vedir lakaz abordab. I annan plizyer kalite materyo ki nou kapab servi pou konstri lakaz. Pa zis bann materyo tradisyonnèl. Nou, nou pe vin pli inovativ dan nou fason konstri.

Me les mon reasir Seselwa, sa politik bonmarse, lakaz an tol e tou lezot term ki

zot in servi pou fer Seselwa per, nepli annan lespas dan nou sosyete modern.

Nou Gouvernman dan konstriksyon lakaz pou vin pli inovativ pou ki kou konstriksyon i reste ba e sa a permet nou konstri plis.

Parti *US* pe kontinyen fer zot per zis parey avan eleksyon zot ti dir si *LDS* pou vin o pouvwar soley pou aret leve. Me ki nou'n vwar pandan sa lan, soley in leve tou le bomaten!

**(APPLAUSE)**

**MINISTER NAADIR HASSAN**

Lo size aköz Gouvernman pe donn *GICC* bann proze konstriksyon? Les mwan premyerman eklersi ki *GICC* i en lakonpanyen konstriksyon Gouvernman. Sa i en fe. *GICC* pou enplike dan bann gro travay konstriksyon pou Gouvernman, me toudmenm *GICC* pa pou enplike dan bann lezot proze. Aköz sa nou pe kontinyen met lo *tender* kot mazorite kontrakter pou annan loportinite pou fer zot lof.

**(APPLAUSE)**

**MINISTER NAADIR HASSAN**

Mr Speaker, alor i annan en kantite pozitiv dan sa Bidze, kontrerman avek sa ki

lopozisyon pe sey fer krwar. Sa Bidze pe met fondasyon pou sa transformasyon lekonomi ki nou oule anmenn Sesel. Son rezilta pa pou la toudswit, me i pou arive aköz sa Gouvernman i determinen pou pran aksyon pou delivre, pou rekonstri nou pei.

Mr Speaker, mon'n asize isi pou 2 zour e mon'n ekout byen larepons bann Manm Onorab. Mon'n vreman dezapwente ler mon tann zis negativite sorti kot Lopozişyon. Zot in montre klerman ki zot refize vwar sa ki devan zot e montre ki zot pa pare pou debout a kote nou pei dan sa moman kriz.

Mr Speaker, mon'n toultan dir ki mon pe en politisyen, me en teknokrat ganny apwente dan en pos politik. Aker mon reste en teknisyen. Me selman Mr Speaker, mon en dimoun ki mon'n toultan dir ek Lopozişyon sa ki zot pa anvi tande.

**(APPLAUSE)**

**MINISTER NAADIR HASSAN**

E mwan mon pou kontinyen dir zot sa bann realite.

Mr Speaker, mon pe al *get real* la e mon pe al dekonstri zot lipokrizi.

**(APPLAUSE)**

**MINISTER NAADIR HASSAN**

Mr Speaker, ler mon ekout Lopoziyon, i annan zis enn de mo ki vin dan mon lespri. Sa se lipokrizi e lafen pouvwar. Les mon dekonstri sa lipokrizi sa parti lopoziyon ki fotespere a fer zot *get real*.

Ler eleksyon ti pe aprozé, zot ti sitan dezespere pou ganny sa eleksyon a tou pri. Zot ti komans depans larzan konmsi napa *demen!* Met en sistenm *FA4JR* ki deside pey nenport ki. Pa ni gete si biznes i merite sa lasistans. Menm bann atraver etranz e ti ganny peye. Ler nou bann teknisyen sa bann letan ti met nou konsern devan, e nou ti ganny dir -

Mr Speaker, (mon ti form parti sa bann teknisyen ler mon ti travay kot Labank Santral.) "Ganny eleksyon i nou priyorite, apre nou a gete ki mannyer nou *deal* ek sa det."

*(laughter)*

**MINISTER NAADIR HASSAN**

Zot kritik sa Gouvernman pou *Air Seychelles*. Me zis en pti keston, anba ki ladministrasyon ki ti akimil sa \$150 milyon det? Eski sete anba ladministrasyon LDSouswa anba sa ki pou zot? Pou zot bann *US* ki dan sa Lasanble, ki pa konnen, les mwan dir zot ki mannyer

diskisyon *Air Seychelles* ti pase avan eleksyon.

Lenstriksyon se pa pran okenn desizyon ziska apre eleksyon. Ankor enn fwa zot prensip sete ganny eleksyon i nou priyorite. Apre nou a gete ki mannyer nou *deal* ek sa. Ankor i montre en parti ki zis enterese pou reste o pouvwar e en parti ki pa kapab pran desizyon.

Mon krwar Mr Speaker, koman sa laspe legal *Air Seychelles* i terminen, mon ti a envit *FPAC* pou fer en lanket detaye, pou montre pep Seselwa ki mannyer en pti laliny aryen in kapab akimil en det par lao \$150 milyon! Lepep apre a zize pou li menm.

En lot legzanp Mr Speaker, i sityasyon bann *field technician* ki ti pe ganny peye anba "*Goods and Services*" kot Minister Gouvernman Lokal. Mr Speaker, sa bann dimoun pa ni ti ganny en saler debaz.

Bann teknisyen ti eksprim zot konsern lo sa size. Ki ti ekrir lo file, "pa pran okenn desizyon ziska apre eleksyon." Ankor enn fwa zot prensip sete ganny eleksyon i nou priyorite apre nou a get ki mannyer nou *deal* ek sa.

La ozordi, sa pti antreprenner Seselwa pe vwar li difisil pou ganny akse avek *loan* abordab e lafot lekel? Be

SBFA, sa ta manboulouk ki'n pase, pa'n pas anba zot *watch*? Oli kontrol ? Sa lazans ti zis en zouti politik pou ganny eleksyon. Ankor enn fwa zot prensip sete ganny eleksyon i nou priyorite, apre nou a gete ki manner nou *deal* ek sa.

Sa lekòl La Rosière pa ankor konstri depi 2007 ziska prezan, i lafot lekel? Ki nou'n vwar sak eleksyon? En promes ki Lekòl La Rosière pou konstri. Me la ki sa Gouvernman in dekouver? Sa plan lekòl i pli gran ki sa bout later ki i sipoze lo la ! E la nou'n fek tann Minis Devika Vidot dir ki later ki ti'n ganny idantifye pou lekòl Anse Aux Pins lo Ile Soleil i tro etrwat pou sa plan.

Ankor enn fwa zot prensip sete ganny eleksyon i nou priyorite, apre nou a gete ki manner nou *deal* ek sa.

E la zot pe lager lebra kas e pou pa ogmant laz retret. Me nou tou nou ti a kontan pran nou retret boner, me la ki swa nou annan? Depi 2018 rekomandasyon in ganny fer avek sa ladministrasyon oparavan. Ankor zot linaksyon in met nou Fon Pansyon an danze.

Si zot pa krwar mwan al demann Depite *Leader US*. Akoz i ti *Chairman* Fon Pansyon sa letan ziska boner 2021.

**(APPLAUSE)**

**MINISTER NAADIR HASSAN**

Mon asire i konn byen sityasyon finansyel Fon Pansyon. Me ki Gouvernman *US* in fer? Zot in prefere poz sa desizyon pou pli tar. Akoz? Ti annan eleksyon. Ankor enn fwa zot prensip sete ganny eleksyon i nou priyorite, apre nou a gete manner nou *deal* ek sa.

*(Interruption)*

**MR SPEAKER**

Silvouple, *order!*

**MINISTER NAADIR HASSAN**

E la les mon dir ki sa ladministrasyon pa ti satisfè ki manner Fon Pansyon ti pe ganny zere. E enn bann premye aksyon ki nou ti pran se pou ranplas son *CEO* ek son *Chair*.

Pli gran lipokrizi ankor se ler bann ansyen Minis ti deklare ki zot pe solider avek Seselwa pou pa pran zot larzan lafen term an 2015. Zis akoz ti annan en eleksyon. Zot ti pe zwen bon boug. Apre ki nou dekouver, anba, anba zot pran zot larzan '*forgo*.' E pa bliye ...

*(Interruption)*

**MINISTER NAADIR HASSAN**



Mr Speaker, mon'n *spend* 2 zour dan Lasanble, mon'n ekout tou Onorab san *disturb* zot, mon ti a kontan ganny *afforded the same curtsy* avek bann Onorab.

**(APPLAUSE)**

**MR SPEAKER**

Mersi e mon a sirtou –

**(APPLAUSE)**

**MR SPEAKER**

Mon a demann tou bann Manm pou obzerv en pe lord silvouple. E mon a sirtou demann sa bann Manm ki pe kriy 'lalang' ki sa i en mank respe –

*(Interruption)*

**MR SPEAKER**

... e nou a kapab arete silvouple e annou ekout diskour Minis.

Minis kontinyen.

**MINISTER NAADIR HASSAN**

Aprè ki nou dekouver anba, anba, zot pran zot larzan 'forgo.' E pa bliye ki sa larzan ti ganny peye ler pei ti deza dan kriz ekonomi. Selman ozordi zot pe akiz bann Minis pou aranz zot lekor. Selman zot, zot ti pran zot milyon. Sanmenm sa lipokrizi sa parti.

**(APPLAUSE)**

**MINISTER NAADIR HASSAN**

Mr Speaker, i annan bann Manm Lopoziyon ki menm annan lodas pou dir ki zot pe al rod sa \$50milyon, me si an premye lye sa \$50 milyon pa ti'n ganny vole anba zot Gouvernman nou pa ti pou bezwen menm al rod !

**(APPLAUSE)**

**MINISTER NAADIR HASSAN**

Parey Onorab Dirizan Zafer Gouvernman ti dir, si nou larzan pa ti'n ganny vole tou sa letan ozordi zot pa ti pou bezwen fer tou sa kankan lo trezyenm mwan saler. Ti pou annan larzan pou peye. La ler napa, zot oule al rode.

Mr Speaker, semenn sa ki mon apel sa lipokrizi sa Lopoziyon. E les mwan swet sa Manm Onorab bonn sans dan son demars pou rod son \$50milyon.

Mr Speaker, zot dir ki nou monte desann *Dubai*, abiz resours sa pep. Eski Lepep Seselwa konnen konbyen ladministrasyon *US* i depase lo *overseas travel* dan Bidze 2019? Mr Speaker, sa sonm i preski R69milyon.

*(laughter)*

**MINISTER NAADIR HASSAN**

Wi Mr Speaker, R69milyon. Sa sonm ti a ede dan peyman en trezyenm mwan saler. Sa ki mon apel zot in donn bal.

Mr Speaker lo sa kestyon Onorab Loizeau, ki si ti annan en lanvlop larzan ki ti ganny donnen koman en *inducement allowance* bann Minis ler zot ti mont *State House* lafen dimwan, mon osi mon'n tande sa parol. Me mon pa kapab konfirman. Me mon garanti ki anba sa ladministrasyon sa bann keksoz koumsa pa pou zanmen arive! Nenport ki benefis i pou dan en Polisi ki ganny aprouve.

Sa detrwa legzanp i montre klerman ki ozordi se sa Gouvernman ki bezwen aranz sa kales ki zot in kit deryer. E aranz sa kales kase, sa ladministrasyon pou fer.

I pa a pran nou 1an ou 3an, menm 5an. Kantmenm a pran nou 10an nou pou fer li. Akoz sa rev ki zot annan pou 2025, pou vin en kosmar pou zot.

**(APPLAUSE)**

**MINISTER NAADIR HASSAN**

Mr Speaker, les mwan fer en lobzervasyon. An 2008 koman en zenn teknisyen ou ti travay lo reform 2008. Les mwan demann Lopozisyon en kestyon. Eski zot parti ler ti o pouvwar, zot ti donn

logmantasyon saler pandan sa bann premye lannen reform? Eski zot ti donn trezyenm mwan saler pandan sa bann premye lannen reform? Eski zot bann Minis, pa ti pran zot benefis?

Pandan sa letan reform, Dolar ti sorti R8 pou vin 12. Ti annan *redundancies* e pri dan laboutik ti monte. Me ki zot ti fer, naryen. Selman avek sa ladministrasyon, zot oule nou fer monte saler, pey trezyenm mwan. Apre zis 3 mwan reform.

Mr Speaker, les mwan dir ek Lopozisyon, pep Seselwa i vwar sa lipokrizi. Mr Speaker, la ankor lipokrizi sa parti akoz zot pe dir ek sa pep sa ki zot anvi tande, me non pa si ki zot bezwen tande. E sa ki laverite. Sa Gouvernman li i diferan, i vin koz laverite ek sa pep kantmenm i bann konversasyon ki dir.

Mr Speaker, mon oule fer tou dimoun okouran kekfwa ki zot in bliye, ki sa Bidze ki nou pe diskit lo la i Bidze 2022, pa Bidze 2023, pa Bidze 2024 e sertennman pa Bidze 2025. Me selman on pa sirprann avek lobsesyon sa parti Lopozisyon avek 2025.

Pandan ki sa Gouvernman pe rod solisyon pou relans nou lekonomi ki nou pei i vwar li ladan, la aktyelman sa parti Lopozisyon li i pa enteres avek sityasyon

ozordi. E ni menm pare pou fer son kontribisyon pou sov nou pei dan sa moman difisil. I plito obsede avek 2025.

Nou tou nou konnen ki i annan 2025. Tou zot largiman pe target 2025. Zot pa enteres avek la zot, me 2025 aköz eleksyon.

Zot latitud pouwar a tou pri i anzandre dan zot. Ler mon ekout zot i les mon krwar ki napa naryen ki byen dan sa pei. Me les mon dir zot dir sa parti Lopoziyon ki zot siporter ki dan servis piblik pe kontinyen ganny en lapey tou lemwan, kontrerman avek mon predeserer k i ti dir lo medya, ki i pou bezwen reviz saler travayer servis piblik.

Zot 10 *MNA* ki la dan sa Lasanble zot pe kontinyen ganny zot saler ek tou zot *allowance* ki enkli R18mil *allowance* lenz pou *Leader* Lopoziyon.

E zot 3 dirizan ki fer konferans lapres tou le mwan, apre dir ki napa latolerans ek laliberte dans a pei. Me kontinyen ganny zot gro pansyon Konstitisyonnèl tou le mwan.

Dirizan parti li son pansyon Konstitisyonnèl pe kout pei plis ki R50mil par mwan e Sekreter Zeneral sa parti pe ganny en pansyon Konstitisyonnèl en pe plis ki R40 mil par mwan.

Omwen vin fran avek sa pep e admet ki sa Gouvernman in fer byen pou garanti lapey total bann ki depan lo li pou en saler.

Mr Speaker, mon tann Lopoziyon dekrir nou *comme quoi* nou en Gouvernman liberal e ki zot, zot bann sosyalis ki'n met zonm o sant devlopman. Me les mon dir zot ki zot versyon sosyalis in vedir pou Sesel. En pei kot pandan zot long direksyon, lapovrete ti mont pres 40 pousan. *Income equality*, savelir diferan ek sa ki annan ek sa ki napa, ti enn pli o dan lemonn.

Kot koripsyon ti'n vin en norm plis ki en leksepsyon. Kot en group elitis in ganny kree avek labi pouwar ek koripsyon. Kot devlopman mendev pa'n en priyorite ki fer ki ozordi nou annan en kantite etranze pe travay dan sa pei.

Kot kantite dimoun lo sistenm *welfare* ti'n depas plafon e kot apepre 10 pousan nou popilasyon ozordi i lo drog.

Wi, se sa zot versyon sosyalis. E ozordi zot vin koze konmsi zot ki pe lager pou dwa malere. Me demann zot lekor si zot swadizan polisi sosyalis ti'n marse, ti pou annan malere dan sa pei?

Mr Speaker, mon'n remark en kantite negativite, laenn e fristrasyon dan lopoziyon. Plizyer fwa mon'n

lans en lapel pou zot travay ek nou, pou rekonstri sa pei. Me zot zwe pa tandé. Zot ankor ankoler ki zot nepli o pouvwar. Plis mon mazin lo sa Mr Speaker, mon realize ki sa parti i krwar ki se zis li ki annan drwa diriz Sesel, aköz i krwar Sesel pou li !

Zot krwar zot nannan en *God given right* pou diriz sa pei. Me les mon fer zot mazin ki Sesel napa en sistenm aristokrasi, ki ou pas baton pouvwar.

**(APPLAUSE)**

### **MINISTER NAADIR HASSAN**

Se pep Seselwa ki deside ki i pou elekte pou diriz son pei. Annou respekte swa Seselwa silvouple. E la ankor enn fwa, mon a fer en lapel avek Lopoziyon pou zwenn nou pou sov nou pei.

Mon pou kontinyen fer sa lapel aköz “Nou pei i pli gran ki nou tou,” zis parey ansyen Prezidan Danny Faure ti kontan dir.

Me si zot pa oule ede fer nou pei bouz devan, nou dan sa ladministrasyon nou pou fer li nou menm.

Mr Speaker, pou konklir mon oule dir avek tou Seselwa ki sa Bidze 2022 i enn ki konservater, aköz sityasyon mondyal sirtou an sa ki konsern sa pandemik COVID-19 i ankor enserten. Nou vwar

par legzanp ki i annan serten pei Lerop ki’n re entrodwir *lock down*. Alors nou bezwen reste pridan.

Parey mon’n toultan dir, nou pa *out of the woods yet*. Sa Bidze 2022 pe osi asire ki Gouvernman i kree sa ki nou apel en *buffer* pou ki nou pa tonm ankor dan okenn trou finansyel ler sityasyon i vin difisil.

Sa Bidze 2022 i enn ki pe met lanfaz lo servis ki servis piblik i delivre. Nou pa pou toler okenn bann ki pa oule travay ou bann ki oule vin fer politik dan travay. Me pli enportan Bidze 2022 pe etabli fondasyon pou kree loportinite pou tou Seselwa ki anvi debourye.

Sa transformasyon ekonomik ki nou pei pe al pas atraver, i enn ki nou pou bezwen tou son zanfán pou fer li vin en realite e en sikse.

Pa ganny kit deryer. Pran nou responsabilite ki sa nouvo Sesel pe ofer nou. Si nou reste lo sa menm trazektwar, nou pou arive kot nou oule ale. Mon oule dir avek tou Seselwa ki fer konfyans avek sa Gouvernman dirize par Prezidan Ramkalawan, zis parey zot ti fer li konfyans le 25 Oktob 2020.

Nou plan in fini ganny met ater. I en plan ki pou anmenn prosperite pa zis pou

en pti group, me pou nou tou. Akoz sa Gouvernman i konnen ki i pe fer.

Mr Speaker, mon a remersye tou bann Manm lo zot larepons pou Bidze 2022 e zot bann kestyon annan ganny pran dan Staz Komite pou sak sa bann antite ler zot vin defann zot Bidze.

Mr Speaker, pou mwan terminen, mon anvi dir ki Sesel i nou pei. Se nou ek nou zanfan ki viv isi lo sa bann zil e se zot ki pou erit sa zoli pei. Se nou sa zenerasyon ozordi ki bezwen fer nou mye pou kit en Sesel meyer pou nou zanfan.

Parey enn mon zanmi pros i toultan dir mwan, solisyon pou nou bann defi ozordi i pa plis politik. Lakle nou fitir i dan lannmen nou bann teknisyen. Mersi Mr Speaker

**(APPLAUSE)**

**MR SPEAKER**

Mersi Minis. Avek sa nou a pran vot lo merit zeneral *Appropriation Bill, 2022*. E mon ava demann Manm ki an faver, lev lanmen silvouple? Byen. Manm ki kont?

Bon vot lo *general merit of the Appropriation Bill, 2022* - 18 Manm. (Onorab Pillay mon pe koze silvouple)

Vot lo *general merit of the Appropriation Bill, 2022* - 18 Manm in vot pour, 7 Manm in

vot kont e 0 abstansyon. *Bill* in aprouve lo *general merit*.

**(APPLAUSE)**

**MR SPEAKER**

Mon a demann Madanm Clerk pou fer *Formal Second Reading*.

**MADAM CLERK**

Mersi Mr Speaker. A *Bill for an Act to provide for the service of the Republic of Seychelles for the year ending December 31<sup>st</sup> 2022*. Mersi Mr Speaker.

**MR SPEAKER**

Mersi Madanm Clerk. Avek sa nou'n ariv a lafen nou travay pou ozordi e nou pe osi *adjourn* lo *Appropriation Bill, 2022*.

Avek lakor *Assembly Business Committee* e an ankor avek *Standing Orders*, mon'n met Staz Komite lo *Appropriation Bill, 2022* pou konmans Merkrede le 24 Novanm, 9er bomaten. Me Lasanble pou zwenn le 22 Lendi e Mardi le 23 pou konsider 3 Mosyon ki annan pou fer avek proses Bidzeter ki Lasanble pe ganny demande pou aprouve avan Bidze.

I pou annan osi en Prozedlwa ki'n lo nou *Order Paper* pou 2 semenn. E sa se *Cybercrimes Bill*.

Madam Clerk i a donn zot tou bann detay dan *Order Paper* pou semenn prosenn.

Pou Staz Komite, komansman Mercredi 24, en program pou bann antite, Minister e Departman oubyen Lazans ki pou vin dan Lasanble, in ganny prepare avek partisipasyon SS Payet dan Minister Finans e bann Manm i annan en kopi oubyen zot a ganny en kopi sa *schedule*.

Mon annan lakor le 2 *Leaders* dan Lasanble. *Leader* Lopozisyon e *Leader* Biznes Gouvernman ki nou pou tenir sa *schedule* ki'n ganny prepare. Mon fer remarke ki'n ganny konsider ki letan i riske kourt lo serten bann *item*, me bann *Leaders* in donn zot langazman pou zot demann zot Manm pou korpere dan sa prosesis pou nou al dapre *schedule*.

I posib ki pou annan moman kot nou pou bezwen koup lalis kestyon dapre letan ki nou annan. Mon bezwen demann korperasyon tou Manm la aprezan. Lo mon kote mon annan de pwen ki mon oule fer an relasyon ek sa Staz Komite.

Staz Komite lo Bidze i spesifikman pou klarifikasyon lo Bidze. I pa la pou deba lo Polisi sa Minister oubyen sa Departman, e mon demann tou bann Manm pou tenir sa

antet e pou zot *focus* lo Bidze ki lo latab.

Mon dezyenmmen pwen se ki bann kestyon i bezwen bref e konkret. Mon rekonnèt ki Manm i kapab fer en *statement* pou etabli konteks son kestyon ki i pe al demande. Me i bezwen fer sa dan en fraz oubyen 2 fraz kourt e i pa kapab fer en long *statement*.

Mon pou bezwen fer zot rapel sa kan i neserer letan nou pe pran Staz Komite. E mon a osi demann Minis atraver li pou son bann zofisye pas sa demann avek bann delegasyon ki vini, ki zot repons - e sa i dapre nou *Standing Orders* osi. Zot repons lo bann kestyon i devret bref e *to the point*. Mon a remersye ou Minis pou pas sa mesaz pou nou.

E avek sa mon a dir tou bann Manm mersi pou zot travay e pou zot partisipasyon e mon swet tou dimoun en bonn restan lafen lasemenn.

Byen. Onorab Pillay mon pa konnen ki pe al lev lanmen lo la. Sel keksoz ki mon a dir, mon pa pe permet deba pou rebran lo soz e mon pe permet okenn langazman avek Minis. Alor dir mwan dan en fraz ki sa ki ou ti a kontan leve silvouple?

**HON SEBASTIEN PILLAY**

Mersi Mr Speaker. Dan en fraz zis pou dir ek Minis *check the facts*. An 2008 ti annan en logmantasyon saler pou tou travayer, menm si nou ti dan reform ekonomik.

**MR SPEAKER**

Ok. Mersi. Byen mersi bokou e nou a *adjourn* ziskan Lendi.

**(ADJOURNMENT)**